

草阁诗集

李昱

文硕阁

wenshuoge.com

目录

关于我们	3
提要	5
草閣詩集原序	6
草閣詩集卷一	7
草閣詩集卷二	14
草閣詩集卷三	24
草閣詩集卷四	33
草閣詩集卷五	35
草閣詩集卷六	51
草閣拾遺	59
草閣文集	78
附錄	80

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

臣等謹案草閣集六卷拾遺一卷明李昱撰昱字宗表號草閣錢塘人南雍志作臨安人蓋錢塘左宋臨安地偶署前代地名非明之臨安也洪武中官國子監助教昱元季避地永康東陽間館於胡氏故集中與胡伯宏兄弟贈答之什最多此集乃昱沒後伯宏及其友徐孟璣陳公明所輯拾遺一卷則其門人唐光祖所輯拾遺之後又附雜文四篇題曰文集不知何人所續輯或亦出光祖之手歟昱詩才力雄贍古體長篇大抵清剛雋上矯矯不羣近體亦卓犖無凡語雖為高楊張徐諸人盛名所掩實則並鶩中原未定孰居先後也未附筠谷詩一帙不著名氏案宋濂作昱詩序稱其子轅字公載為詩能繼其家千頃堂書目亦載有李轅筠谷集註為李昱之子為宜綸縣丞殆編錄者以卷帙無多附其父後觀詩內有冬至前日侍文謙胡伯奇濟生堂七言一首是轅作之明証矣朱彝尊曝書亭集有昱草閣集跋而不言未附筠谷詩或所見之本偶佚此卷也

乾隆四十三年六月恭校上

總纂官（臣）紀昀（臣）陸錫熊（臣）孫士毅

總校官（臣）陸費墀

草閣詩集原序

詩之體製雖始於三百篇歷代作者遞加緣飾至李唐而後大備其五七言律及絕句既前此所未有古風歌行樂府諸作往往上逮建安黃初蓋詩道之盛至是斯極者當是時也惟杜子美李太白為冠絕古今雖以韓子之才而猶稱二公之文光焰萬丈則其非人所及可知者自是以來能詩之士代不乏人終莫能追蹤李杜其間有能悉心探索刻志模擬者則亦各自名家流傳不泯蓋二公之天才力學所以自得之妙固未易深契然其律呂可按矩度可尋故學之者真積力久未有不自成以至可傳者也錢塘李君宗表善為詩精熟清新氣雄而辭暢一出李杜二家機軸其友天台徐一夔嘗稱其緣情拈事機動籟鳴無窮搜苦索之態而語皆天出不煩刻雕不渝盛唐之家法識者以為的論君初居錢塘少從進士永嘉鄭公僖學僖奇其才以女妻之學成結草閣居北關門外若將老焉後避兵金華翱翔東陽永康二邑間有司常舉上考功奏補國子監助教未幾以病免卜築永康開門授徒與其邑之人士詠觴酬倡以相樂其歿也胡伯弘既塋之魁山之下而其子轅又以瓊州宜倫縣丞歿于官君之詩由是多散佚徐孟璣與伯弘及其友生陳公明相與哀輯得古今詩四百餘篇唐仲暹編為六卷將鐫諸木以傳而徵余為序余既喜公之詩又多諸友之義故書此以見君之詩得其師法而用力非淺信有可傳者焉君名曄宗表其字學者稱為草閣先生轅字公載為詩能繼其家不幸早死士林惜之楚府長史致仕金華宋濂序

草閣詩集卷一

五言古詩

凡十四首

李杜日已遠疇能振風雅
𠄎哇既紛靡視古氣益下
雷鳴喧瓦缶遂謂黃鍾啞
魚目輕夜光駑駘鄙宛馬
獨立天地間長懷何由寫
白雪非不彈舉俗和者寡

人生宇宙間愚哲惰與勤
年華不可再努力思超羣
大禹寸陰競陶侃惜其分
不見東流波晝夜方沄沄
吾徒但飽食與俗同繽紛
既無良平智又乏賈鄧勲
立言著當代庶以期斯文

穆王瑤池宴八駿爭先之
渠黃既電邁騾耳亦風馳
舉觴勸王母回鞭自西陲
造父策其勲聲價傳當時
顧謂駑駘輩道坦爾其來
日暮路且遙倒行方逆施

鳳凰被五采自顧何葳蕤
朝飲醴泉水暮宿梧桐枝
虞廷舞簫韶周時或鳴岐
和聲感至治千秋一來儀
孔聖實繼作盛德元匪衰
佯狂者誰氏乃獨歌已而

滎河不愛寶龍馬負圖出
人文兆鴻濛列點昭星日
皇覽契玄造俯仰已致密
五行妙生成八卦定凶吉
大哉周孔聖以道相繼述
雖云六十四萬彙始畫一

夏后承四載胼胝事洪流
龜文自天錫大法列九疇
皇極居其中錫福為民休
商辛既不極姬政日以脩
愍勲訪箕子彝倫為咨諏
至哉君子心傳道非臣周

吾觀詩三百豈徒正而葩
其言本情性反覆成詠嗟
二南迺其端列國多淫哇
洋洋雅與頌制作功尤嘉
善者固敦厚惡者亦紛拏
聖人示我要蔽以思無邪

姬轍既已東王綱日陵替
蠻夷遂猾夏諸侯亦專制
雖稱葵丘盛區區假仁義
大哉春秋筆斧鉞嚴可畏
是非予奪間立法垂萬世
孰云吾道窮經成感麟至

揖遜稱唐虞征誅尚湯武
煌煌帝王德簡冊傳千古
云胡巢與由萬乘棄如土
采薇首陽巔夷齊獨何苦
周衰逮彊秦併吞猛於虎
驅民赴兵戈白首填草莽

江都遊未返豺虎方鬪縈
堂堂龍鳳姿舉義揚旗旌
擒充戮建德銑舉不日平
功高即帝位貞觀蜚英聲
惜乎晉陽謀兼受突厥盟
婚風既相踵敵馬來縱橫

子雲不曉事老厭居執戟
法言倣論語太玄擬周易
美新無乃佞意謂伸蠖尺
投閣身致危於道竟何益
何如淵明翁敝屣棄彭澤
浩歌歸去來南山聳秋碧

白水奮炎祚赤符應天休雲臺二十四烜赫皆封侯富春有故人物色來羊裘翩然不受爵獨釣滄江流元功布衣婦所進多嘉猷伊誰秉史筆類與隱者侔

三國既鼎峙髦俊紛如林恭惟諸葛公出處實所欽結廬南陽卧抱膝梁父吟管樂雖自許伊呂非難任君看三顧餘驅馳勞寸心拳拳出師表讀之涕盈襟

牝雞司晨禍變亂五十秋向非張公能唐室幾為周斬本須斬根絕水當絕流惜哉不及此三思乃見優事機一以失養患成姦謀崎嶇道路遠竟死誰之尤

古意一首送轅

渥洼有良馬倜儻飛龍如遺種落人間觀者立踟躕被以黃金鞍絡以明月珠雖非急難才人謂汗血駒勉餐雲中草養爾八尺軀勿隨駑駘後駉駉思並驅長楸試天步真能服鹽車孫陽儻爾逢拭目超雲衢

答呂慎明

清晨聲剥啄有客扣我扉車馬何聯翩林壑生光輝嗟予久離羣屏跡甘布衣故人金石交乃肯念細微上堂具尊酒方圓進甘肥君諒篤高誼不醉將安歸攘攘宇宙間以利相因依交游豈云少所恨知音稀管鮑如可作茲理儻弗違願為雙黃鵠與子俱遠飛

懷舊一首

齋居秋夜長客子不能睡開門四無鄰皎皎月在地故人天外書三年袖中字跡疎心每親路長何由至

歲暮懷徐德裕

客居在南山山空歲云莫青陽殘夜逼華髮流年度掩書坐無聊風燈影回互懷我冰玉人悠悠隔長路孔孟垂微言夷齊振高步千秋常不厄人能識其故吁嗟宇宙間狂流肆馳驚何由枉巾車相與論幽素

秋夜感懷

秋風吹我衣明月照我床徘徊省中夜感慨祇自傷冥鴻在江渚蟋蟀鳴高堂亦有露草螢隨風恣飛揚物理儻如斯昊穹理茫茫棄置何足云吾將採瓊芳

暮春書懷二首

流光既云邁春事日已深野情嗜踈散奈此違登臨今晨鼓我琴何以寫素心浮鱗躍清沼好鳥鳴高林微颺左右至嘯傲以開襟欣欣與物會默默還自任古人亦已矣後來孰知音

閑居習踈懶歲月漸成癖心幽遠世慮地偏少人跡是時春向暮芳草萋更碧鳥啼簷間樹花落溪上石悠悠發長吟命酒聊自適人生任天性焉能為形役

菜圃為鄰畜殘而作

孟嘗久不作吾徒食無魚長齋坐清晝賴此田中蔬僕夫勤灌溉引水通溝渠青青日已長盡是辛苦餘封豕從何來荐食良可吁一殘枝蔓傷再則根祇除遂令蒼翠場轉盼成空虛嗟我在羈旅草野聊暫居惜無樊籬固悵望徒踟躇踟躇將奈何屏棄犁與鋤學圃聖所鄙且讀窗下書

摘荳示輓

山居既幽寂何以娛清晝呼兒啟柴扉共摘園中荳繽紛漸盈把微雨濕衣袖追思菽水奉歲月不可又雖無然其戒兄弟缺相觀乾坤浩茫茫我獨守孤陋生涯固云好終焉懷其舊感此成新詩歌之令人瘦

登中臺山

似聞中臺山上有招提境興來每欲往俗事不可屏今晨登長塗老步困馳騁因之事幽討蠟屐聊為整崎嶇路百折拄杖穿細嶺颼颼風乍響慘慘日將暝扶持賴門生乃始登絕頂其居若平地雲生動成景山僧倒屣迎汲泉為烹茗共談出世法坐對白月影朗觀心地初爐薰夜方永不待聞晨鐘冷然發深省

發雙溪

峩峩金華城行李何淹留閏十月初吉始能具扁舟輝輝晴旭升莽莽寒烟收篙師戒晨發浩嘯當中流握手謝送者此行實夷猶昔為山林居今作江海遊撫心媿麋鹿放跡同鳬鷗丈夫既許國生理焉得謀功成纔拂衣庶以追前脩

泊鷓鴣灣

朝辭婺女城暮泊鷓鴣灣鷓鴣暝不見但聞水潺潺水聲日西流客子何時還長風吹征衣慘澹生愁顏

泊蘭江

我舟泊蘭江江水淨如練孤雲塵外飛歸鳥鏡中見回環城數里雜遝山百轉何年徐偃王於此建古殿陰廊斷人跡敗壁留蝸篆題詩感古昔荒哉瑤池宴

過白鴈灘

前逢白鴈灘灘聲急如雨扁舟勢逆上百丈難遽舉風寒雲欲墜冰潔石可數寒冬景蕭條況我值羈旅故居日已遠所思在兒女有鴈不寄書虛名亦何取

宿桐灣埠

蚤歲游江湖倏忽逾半百偶遂花溪隱山水環我宅教兒業詩書課僕勤稼穡投閒未三載又作遠行客繫舟桐灣埠衣袂帶晚色風吹野燒紅月照灘水白舟中二三友相對訴胸臆夜長不能眠擁被情默默

息灘

息灘復息灘逆上如登天舟行勢齟齬百丈不可牽人持白木篙左右柱兩肩倒緣凌風檣俯貼衝波舩分寸累丈尺始能就其顛回頭望來者相去一丈懸我生匪利涉坦易性所便因之戒行險庶資遠游篇

胡樂站

清晨發崇上四十五里程蕭然見古驛四壁惟榛荆道傍有候吏倒履遙相迎烹茶坐來久各伸羈旅情更深始就睡乃聞喧逐聲披衣問如何有虎負豕行

張家灣

扁舟帶晚色小泊張家灣寒光蕩虛碧縹渺冲瀾間北風吹黃蘆慘戚遊子顏區區短篷卧十夢嘗九還須與桃花溪咫尺石井山隔枕忽驚覺水鳥鳴關關

丹陽湖

泛舟丹陽湖水鳥何繽紛或飛或飲啄倏忽千百羣千百亦不盡藹藹如浮雲蕭蕭影自照嘖嘖聲相聞嗟尔稻粱謀來往多辛勤漁郎集網罟焉得防朝曛

采石

盡日行扁舟始至采石口沉沉夜色靜寒波落星斗憶昔騎鯨人捉月月在手不知千載下豪氣猶在否我來賦新作筆底蛟龍走欲招宮錦袍樽中惜無酒

揚子江

滔滔揚子江江流日千里古來限南北今看平如砥我行屬冬候際此風日美振拖羣魚驚推篷一鷗起須與棹歌發客子心亦喜平生濟川心造次聊試爾

姑蘇城

迢迢姑蘇城其勢高百雉古來餘霸習英雄迭興廢一夫起離役遂擅西南利經國無遠圖俄為巨明制憶昨鏖戰初矢石飛雨至殺聲相交加白骨泥沙棄敵樓今尚在往事流水逝我舟一經過恍惚如隔世俯仰二十載風物不可記頭黑今已白感慨夜無寐

嘉禾

晨發嘉禾城晴日舒我顏水深野岸濶驛古秋花斑回頭指點中已過三塔灣少年所游地頭白今始還沙鷗喜我還來往清波間願為忘機翁與爾俱投閒

武林

舍舟東新橋徒步北郭門人烟竟蕭瑟往事不復論晨炊起斷壘秋草生頽垣平生富麗地轉盼成荒村入城問所交十室纔一存諸生幸頗集日夕具酒尊有兄在苕川久別勞夢魂那知十五載再叙骨肉恩吾兒渡江至迎我歸田園田園豈不好況有可抱孫松楸兵燹餘何以慰朝昏遲行復遲行淚下聲復吞

旅館夢先人覺而有感

先人已云亡哀哀我所思所思不能已中夜夢見之春風顏色歡手把梅花枝諄諄過庭訓以示夙昔辭顧慙伯魯昏受簡恐復遺雞鳴星在天蕭瑟回風吹推枕耿不寐吞聲涕漣漣豈伊道路長冥漠相維持乾坤浩茫茫江水日夜馳江水亦不息我心永傷悲

遣瘧鬼

汝本顓頊子變化逃其形胡不肖厥祖騎龍升帝青而為瘧鬼徒屑屑居滄溟復游人間世所在行威靈舌光霹靂飛怒目張朗星坐令命蹇子狼狽汝所丁其寒誰致然其熱孰使令淒淒挾絮纈喘喘思風亭肉黃面亦皺呻S吟Y不可聽巫師用桃茢醫師進猪苓汝常固蟠結百藝無一寧嗟汝聖王裔區區獨伶俜遷善迺令德肆虐非常經我今賦新詩送尔揚歸舲東方有蒼龍鼓腹生雷霆西方有白虎利口惟臚腥赤鳥司南方丹砂耀脩翎玄武在北方閃目光熒熒四方汝無往恐汝罹天刑汝宜返故鄉寒泉肅泠泠綠荷以為衣丹霞以為局珠簾水晶幌貝闕琉璃屏洛妃奏清曲湘娥荐芳馨飄飄曳鸞旗洋洋下雲輶速行如風火晝夜不可停從此勿迴首一去三千齡

宵行效陰何體

纜舟纔晚憩驅車復宵征脩途帶殘夢曉色動微明拭目近山色傾耳遠雞聲雨過石猶潤岸窮橋始橫屬茲清秋候迫此羈旅程孤懷雖自慰迢遞難為情

墨梅

烏不涅而黔鵠不浴而白其類雖有殊各以見真色畫師亦何心變幻隨世惑展圖對梅花為爾心惻惻

次韻妻兄鄭伯武見寄

人生如秋蓬飄飄易為別回頭憶往事令我愁欲絕伊昔狼狽初風塵暗南北晨昏但奔走衣帶不得結載揮賈生淚徧歷太史轍西辭吳山青東望越水白是時苗獠盛跋扈興妖孽我兵氣不揚我馬骨已折賤子復何為懷玉聊被褐謀生乃盡廢事業安得說結廬花溪上既耨還復輟平生性駑鈍屏趾恥干謁維時元運移飛龍奮天闕大臣方召輩議論甚剴切蒼生免塗炭枯朽得再活曄也非其才徵書下東浙或談帝王畧從橫吐胷臆或稽周孔訓輪畚侍君側顧慚內空虛衣冠廁羣哲成均忝司教游藝隨所適風痺忽我嬰形容頓銷鑠為官既無分上疏乞骸骨歸來對青山及此日未夕別君二十載憂喜不同域君有子與孫良田環美宅我仍跡羈栖暖眼惟梨妾長子三十餘讀書僅謀食三孫未成人頑嬾俱失學三女各有歸織紉喜不拙君年七十三我近六十七枯楊雖生梯能忘舊佳匹載懷外舅氏冰清儼人物生死骨肉離情懷為之惡何由上南斗握手論紆鬱愁來夫如何醉飲酒一石

送轅兒一首（併序）

轅兒以文學徵匆匆別我無可言者伏念聖朝憂老許令一子奉養而吾年已七十闕定省之候菽水之供情見乎辭不能自己云

聖朝御六合治化如陶唐任賢去姦邪綱紀日以張細材桷與榱鉅材棟與梁嘉謨滿丹陛玉佩鳴鏘鏘府帖急星火昨夜下永康嗟汝玷儒流乃以文學揚文學本德行純孝多流芳熒熒爝火微詎裨日月光我今七十翁風痺卧在床崦嵫既已迫衰颯方自傷齒牙半脫落頭髮盡已霜况兼左耳聾兩目俱茫茫賴尔營束脯糊口走四方藜藿供我餐湯藥供我嘗今茲捨我行言及我淚滂念欲隨汝去十步九步僵汝哭離我膝我愁裂中腸扶病送出門東風為淒涼吞聲竟嗚咽氣盡語不長汝行勿我念努力隨忠良所憐三小孫路遠不得將不如棄溝壑誰與輸餼■〈食 量〉聖朝許侍丁恩波浩洋洋茲情儻得伸望汝回故鄉

言懷五首

出門多炎埃舉步不可觸野人嗜蕭散所志謝流俗高齋寂無人當午眠正熟神遊羲皇上夢

繞滄江曲翳翳境初晴勻勻息還續忽覺聞餘聲清風動林竹

郊原生意新靈雨既霑灑賤子携酒醪往餉耦耕者文章本虛器衣冠亦云假何如務稼穡白首在田野是時日向暮川色明可把遠林鳥雀聚峻坂羊牛下澹然竟忘歸悠悠遽難捨獨立臨長風中懷何由寫

魁山一茅茨中有無名氏頭戴鹿皮冠髮白絲不理齋居了無事危坐烏皮几流觀高士傳放跡心獨喜紅塵樹外隔清風竹間起俗客不我過其門靜如水嗒焉似忘我稽首南郭子

今日忽不樂少為川上遊童冠相追隨衣服紛好脩紆徐既就坂崎嶇亦經丘是時鳴雨餘氣候如清秋怡然挂孤藤聽此涓涓流往者既云邁來者無時休周流信無滯至樂常悠悠俗士勿與言永為智者謀

新沐換輕幘振衣坐南軒軒前何所有嘉木陰以繁林端響靈籟幽趣難具論好風既南至流火將西奔寒暑互推遷日月相朝昏至人體天運閑居寂無言尼父溫伯雪目擊道已存如何支離子聒耳來喧喧

草閣詩集卷二

○七言古詩

寄太平諸友

昨日東風吹雨過正值山齋罷書課無官可守真自得
有酒不飲誰能那此時況當春夏交綠靜園林安敢唾
出泥已誇籬笋嫩入饌頗憶溪魚大花間紫騮來幾足
葉底黃鸝鳴兩箇桃君諸公多俊才遠來相就同賡和
能文何如揚執戟劇談每羨陳驚座水心風流今尚在
正獻家聲遠猶播伯仁之孫本奇士亦有詩僧兼種糯
楚人擬作韋曲遊諸公復忍東山卧誰謂更深雨復作
到曉打牕驚夢破寧愁烏帽顛風吹尚恐蠟屐春泥浣
沾毫惆悵題我詩天晴更為斯丈賀

聚上人鐵筆歌

昔時智永鐵作限今時善聚鉄為筆筆底曾經百鍊功
篆隸雕鏤體非一握波縈迴垂露灑金鵠虎爪相輝光
琅函夜啟玉剛卯笑倒籀史驚鍾王我作中臺山上記
一揮四百二十字聚也運鋒勒翠珉至今矯矯龍蛇勢
草閣巖居雲氣深上人一來聽我吟要將鐵筆化采筆
叢林價重雙南金

贈地理遠碧山

澗東瀟西曾卜洛定之方中楚宮作當時相宅論陰陽
猶未經營到冥漠後來注意馬鬣封某丘某水尋靈踪
封侯作相在頃刻芒鞋踏遍青芙蓉遠師本有降龍技
隨處看山逐龍勢金華一郡凡幾家屢見牛眠得佳地
我家近住東屏山時與遠師相往還青囊和月挂松樹
且酌美酒開心顏我聞金陵帝王宅虎踞龍蟠出奇特
遠師飛錫宜一遊歸來說與漁樵流

送顧仲明之常熟州教授

自從吳中識君面江海相違復相見交情不下十年餘
歲月匆匆若流電尚憶清風八詠樓與君喫酒楼上頭
酒酣借箸為節擊狂歌落日驚沙鷗聞道蘭亭看脩竹
官冷三年食無肉褐袍纔樂柳汁青又載琴書問常熟
此州吳公之故鄉絃歌彷彿聲洋洋孔門政事出文學
坐令州牧成龔黃朝來河雨添春水吳船催發吳歌起
酌君別酒情未已我亦衢州整行李人生離合真可憐
臨行把袂心茫然相期出處各努力淞水東西謾相憶

踏車行

南岸北岸聲咿啞東鄰西鄰踏水車車輪風生雷轉軸
平地雪寒生浪花借問老農何太苦低頭欲語還咨嗟
前月有雨田未耘非其種者紛如麻縣吏捉人應差役
令嚴豈得營私家況當

今月滴雨無陂塘之水爭喧譁雖如抱甕沃焦釜蹄涔豈足供泥沙語罷踏車車轉急田水何如汗流濕老妻貸穀猶未歸力疾無奈吞聲泣

喜雨行

五日不雨中禾焦十日不雨晚禾死農夫田父心煩勞桔槔捐捐徒為爾俄然雲起從西北一片飛來頭上黑六丁雷斧開天關不盡天瓢瀉甘澤沛如萬頃之銀潢疾如江漢流湯湯怒如龍物騰變化颯如白帝行秋光在坑滿坑谷滿谷此雨何殊雨珠玉甌窳汗耶無復分但見芄芄稻花熟東家老翁賒酒勸西家女兒賣釵釧青黃未接渾未憂屈指豐年眼中見我歌不獨如元豐我歌直與康衢同此身願作飯牛翁耕田鑿井堯無功嗚呼耕田鑿井堯無功

農家謠

高田低田禾盡熟農家農家生意足腰鎌在手如割鮮玉粒如山寨茅屋親戚鄰舍懽樂同酒酣社鼓歌老翁阿孫將米換魚肉老嫗髻插山花紅時和迺由天子聖元豐之歌敢同盛嗟嗟鼠竊滄海邊胡不賣刀買犢來歸田

誕日醉吟

先生今年五十一兩鬢雖斑眼如漆挑燈終夜何曾眠細字蠅頭看書帙既不能握簡起草趨明光又不能搢旗斬將赴敵場布衣十載困江海空有崢嶸磊落驚世之文章近來結屋翠峯下白雲繞屋看如畫王侯卿相不到門自與農夫作鄰舍螳浮缸面新酒渾清晨上壽誰稱尊阿兒拜前女拜後此樂欣欣難具論盤餐照眼復何有出甕黃虀間青韭山田放豚初告脬潑刺鮮魚貫霜柳須臾剥剥啄啄叩門急携肴載酒來諸生陶然洗盞復更酌雖無絲竹管絃之盛亦有鏗鏘澗水和此颼颼萬壑松風聲松風為我清松月為我明眼花耳熱不知夜但知百川一吸如長鯨我醉欲眠卿且去謫仙未得其中趣玉山雖倒嗔人扶染筆從容賦長句我不願二十四考書中書我不願千二百歲崢嶸居但願百年三萬六千日日日醉吟懽有餘

秋宵七恨（并序）

荀卿賦篇於知雲蠶歲之辭始隱而終露又疊以應之予嘗愛其異偶值秋宵不堪旅次韻成七恨以為一代之新體云

青蘋葉底聲蓬蓬當年曾號襄王雄秋高八月勢轉急忽來吹我茅屋東今我夜坐難秉燭使我髮白成老翁吁嗟恨爾之秋風（風）

六月一滴不霑土連夜淋漓獨何苦紅蕉碧梧語葉上黃茅屋漏那能補雞鳴嚶嚶天欲曙况迺蕭條在羈旅吁嗟恨爾之秋雨（雨）

嫦娥竊藥奔蟾窟老兔千年擣何物玉鏡初從海上来冰輪又向雲間沒借問胡為有圓缺不與愁人照離別吁嗟恨爾之秋月（月）

西風古城夜向深滿牕白月光沉沉羅幃美人勞寸心雙杵忽傳空外音寒衣不來道路遠丁東落耳愁難禁吁嗟恨爾之秋砧（砧）

伶倫截竹纔過尺一吹能裂蒼崖石況復聲聞折楊柳對此令人多感激中宵無人萬籟靜天上殘星猶歷歷吁嗟恨爾之秋笛（笛）

疾雷鳴夏風鳴冬秋來鳴者難為容露寒九月入床下啾啾唧唧羣相從十回歸夢九回斷起坐積憤填心胸吁嗟恨爾之秋蛩（蛩）

洞庭波寒秋影亂幾回相失聲相喚艸木黃落始來賓頗似人生繫微宦數年寄書長不達應負冥冥在霄漢吁嗟恨爾之秋鴈（鴈）

贈蔡正伯二十六句

石井田邊讀書處好山繞屋青無數尋常俗客不到門自得平生隱居趣中山蔡君清有餘拄杖衝寒忽相遇升堂磬折延上座揮塵懸河發談助酌君射洪之淥酒煨以岷山之紫芋取琴為我彈赤壁如此英雄大江去起看星斗光闌干天風蕭蕭襲衣屨方今四海頻戈鋌與君飄蓬同旅寓藤床對月談未了清晨告別何匆遽惜君豈不苦挽留肯伴山間白雲住豈無鮑叔知管仲亦有陳蕃下徐孺臨分握手情依依聊復揮毫賦長句君能別後重相尋記取門前兩槐樹

徐君德裕輓歌

徐君先裔中山人作令來字花溪民至元年間一大治百里藹藹桑麻春只今相去百餘載甘棠不伐懷其仁乃知作善天降禎衣冠後代何振振其孫德裕才卓犖壯年談笑紅蓮幕逸氣稜稜萬里駒高懷矯矯層霄鶴晚節無心向朝市自識山林有真樂杜門不復趨權豪竟與時流如枿鑿忽朝議事忤鄉童鑠金織具嬰其凶鳳陽閱歲歿王事長淮浪險多蛟龍遊魂欲歸道路遠梧桐葉底隨秋風有子積憤填心胸晝夜號泣呼蒼穹幾回頓絕欲俱死身着麻衣走千里哀聲欲斷楚山雲血淚應添楚江水艱難收骨歸故鄉思欲與親雪其恥一日思親十二時夜卧慈顏夢魂裏卧薪嘗膽仇不忘綉衣持節來東方揮强扶弱問民苦白筆凜凜飛秋霜親仇從此獲一雪魑魅魍魎何由藏長塗赫日屋埃黃行行械繫投邊方鄉中耆舊皆嘆息徐家孝子真難得老夫聞之亦喜舞為寫長歌相勸激我歌不獨誇鄉閭要使觀風達宸極君不見孝子即忠臣會見簪纓繼前澤

次韻東坡白戰詩

稚子携壺沽竹葉怪底紛紛亂飛雪江天雲氣凝不流海間波濤來無絕支機石殞光欲碎承
露高莖凍應折草中誰憂狐兔死麥根已喜螟蝗滅天涯客況勝雪冷歲裏光陰驚電掣吟脾
清苦出秀句望眼昏花舒醉纈誰家洛下閉門戶幾人海上餐氈屑是非千古冰鑑在榮辱百
年風鳥瞥紛紛狂態安足數炯炯孤懷向誰說夜深感慨那能眠但覺衾稠冷如鐵

王昭君歌

明妃漢家人自小生金屋金屋花連春晝長東風養得顏如玉一身願作陽臺雲琥珀枕邊常
夢君誰知閒門跬步地年年草色生羅裙邊城昨夜悲笳起單于求親漢天子黃金不買毛延
壽翻作無鹽畫圖裏畫圖妾貌兩不同玉鞭催上浮雲驄畫官喜舞天子惜臂上猶存紅守宮
愁雲茫茫天萬里白草離離塞烟紫回首長安何處家琵琶聲中汨如水單于髮黃雙眼青嗔
咍遣譯通丁寧氈廬寒月射秋夢安得風吹歸漢庭妾身不惜安邊計婦人豈足揚兵氣單于
那知甥舅恩貔貅百萬能無媿明妃塚前青草肥宮衣化作彩雲飛生無羽翼度關塞死後魂
隨秋鴈歸

北上行送周士約

停君鐵如意飲我金叵羅我有北上行起舞為君歌念此北上樂君行莫蹉跎披雲登太行敲
冰渡黃河黃河連天與天碧織女大笑投銀梭紅雲暖光開玉闕流星煌煌夾明月簫韶之音
下紫清太液恩波流不竭去年前席召賈生今年上書薦禰衡鵬搏虎變不可測布衣談笑為
公卿吾道昌丈夫北遊須帝鄉紅顏才子青雲郎文光照曜宮錦裳紫騮馬肥金鞍光蓮花匣
出三尺霜黃金臺高天中央紫琳作佩聲鏘鏘聖主恩深跨陶唐好賢不數燕昭王北上行君
莫忘

東軒歌四十八句為伯弘昆仲賦

酌君東軒酒贈君東軒歌君家之軒甚踈豁分明結構依巖阿上有魁山之崢嶸下有堰水百
折之流波山盤水繞路不盡地幽往往聞鳴珂軒中有人冠峨峨怡怡之集何委蛇秋天鴻鴈
序偏肅春日棣花陰更多正當日出東方時陽烏飛上扶桑柯層軒面面皆陽和六龍銜耀青
天過伯氏仲氏吹埙篪叔也季也能同科況君有母壽而康兩髯不着秋霜皤友于奉觴更上
壽綠酒微覺朱顏酡臨軒手把東皇衣願求齡永福且那谷風東來射花柳海月東出穿松蘿
東里先生嘗叩門鳴玉曳組肩相摩或工苦語似東野或騁豪句如東坡種瓜或作東門遊賞
菊或向東籬哦西山朝來恰對我拄笏雲氣相噓呵村南村北亦有隣或荷農笠被漁蓑此軒
實為東道主賸有人物如星羅嚶嚶黃鳥鳴高枝娟娟白鷺浮盤渦歸鴉或棲雪後檜游魚或
觸風前荷有童慣養尸鄉雞有客共玩山陰鷺草閣道人投東來開軒延飲黑日閒婆娑琅玕
錦綉不足報但寄詩筆懸長河

題王子榮主簿所藏醉猫圖

涼風晚香吹茝苕狸奴咀之酣且卧金睛不動尾鬣髭翠屑闌珊落餘唾眼前黠鼠紛如雲白晝從橫喜相賀翻盆攪甕任汝為草性須臾如酒過奮鬚一攫何所逃腥血空令齒牙浣黃筓老手妙入神安得徧示寰中人嗚呼安得徧示寰中人

觸體挽車圖

車麟麟車麟麟觸體挽車挽斷筋借問何辛辛一家骨肉在一身紅絲繫足非良因彩衣兒女徒欣欣載重力微每見嗔鞭之扑之亦有因嗟哉觸體之骨已如銀觸體之苦如積薪觸體入土還笑人後車來者無停輪

九鷺圖

何人水墨開毫素白日晴牕起烟霧強將醉眼窺微茫乃見江南九秋鷺兩隻長鳴一隻飛兩隻共啄菰米肥其餘四隻夢洲渚黃蘆白葦相因依我家曾住苕洲上綠蓑披雨聽漁唱西塞山邊今有無桃花流水應新漲別來幾載接林巒身欲奮飛無羽翰卷圖高詠風漠漠憶爾磯頭青釣竿

狄仁傑諫復廬陵王圖

金戈玉戚平四方英雄只數唐文皇惜哉龍飛起晉陽婚風相繼流餘殃牝雞之晨及其常天樞崇崇勢莫當壘也居然垂袞裳竟以褒姒談虞唐鸞臺鳳閣遙相望合置杞梓羅圭璋翩然木鶴來求凰吹笙子晉儼在傍雲牕霧閣事渺茫妖狐遂闕東宮墻嗚呼仙李根摧傷存者僅有廬陵王狄公正笏持朝綱直辭凜凜生秋霜神堯大器安可攘儲君不復我涕滂沒身事付桓與張虞淵日落回重光瑤圖三百漢共昌至今青史傳芬芳

嘲鳩三五七言

雙鶉鳩毛斑斑陰雨逐婦去晴天呼婦還嗟哉爾婦良不易愛憎只在須臾間

處女吟

深閨有處女盈盈好顏色施朱太赤粉太白畫工如山貌不得年逾三十不嫁人蹇修塞門守愈真清晨去來山上柏願以苦節終吾身東風吹綠階前草蝴蝶雙飛一何早長門白日苦花多人生只似花開好東家小姑嫁大官錦靴笑坐黃金鞍一朝失寵如敝屣鏡中孤影愁離鸞西鄰小妹嫁豪賈聘與黃金賤如土失身乃在江海間夢魂長怨風波苦何似深閨處女吟許身真比雙南金寄聲小妹小姑道嫁人容易紅顏老

吳將軍歌贈邁善鄉

吳將軍天下雄目如朗星氣如虹平生讀書不怕死惟有秋霜烈日皎皎是孤忠曾攀丹桂枝
飛上銀蟾宮紫皇賜以白兔藥令將軍起民彫瘵蘇愚蒙去秋蝮蛇從西來渡我淞水東磨牙
白參差吮人肌血豺虎同將軍躍馬如遊龍笑持三尺莫邪鋒剗蛇之腹馘蛇首魂魄散亂隨
秋風又聞枯蒼山千疊萬疊青芙蓉山深狐兔作人立火雲獵獵旌旗紅將軍手撚鉄絲箭腰
挂麟膠弓竟從荒茅野草入一洗妖媚無畱蹤民無居將軍墉民無田將軍農秋田滿眼春芄
芃賣刀買犢期年豐夜來撾鼓聲籠銅乃是將軍奏凱歸越中越中民喜且雍走白叟歌黃童
牽羊載酒遮道迎迎我詩書禮樂之元戎有母有母垂霜蓬升堂百拜懽動容有兒為國立大
功忠孝一心天感通烏臺卓立高崇崇薦章如雲達九重九重日月光重瞳璽書蚤晚來徵庸
噫吁嚱吳將軍安得如公數十輩落落棋布嚴提封

鴻門舞劍歌

鴻門大將輝重瞳虎視六合無英雄當時灞上隆準公摧眉俛首趨下風青蛇光寒射尊俎酒
酣拔劍為誰舞一舞范增身若雲再舞張良面如土神鋒慄魄可奈何喚取楚人歌漢歌當筵
對舞張羽翼紅烟紫電相盪摩須臾舞罷沐猴悅亞父翻成背流血玉玦不靈玉斗裂楚漢雌
雄從此決

月氏王頭飲器歌

北風吹寒地椒短捲毛綿羊尾脂滿國王愛飲蘆酒漿鑕刀巧削玻璃碗玉淫雲氣蒸髓紅神
光欲裂泥丸宮血魂斃面訴上帝怒鯨倒吸銀河空紫檀琵琶作怨語彩姬如花踏筵舞豈知
讎骨填糟丘鬼馬悲鳴草根雨湘鬼髑髏空獨醒劉伶墳上苔花青何如將身製鸚鵡生死不
離雙玉瓶

胡將軍歌

胡將軍邦之良武之豪身長八尺面如鐵敵人見之凜凜生寒毛憶昨辛卯歲九州沸鯨濤蒼
生日塗炭呼天雨泣何嗷嗷吳王氣宇真天人手提秋水三尺之豪曹貌貅萬竈會滌上左右
環列俱賢髦將軍謁轅門開口談六韜為王之爪牙出入行陣躬韃囊洩江江水流滔滔疾如
風雨飛十艘王命胡將軍螯弧螯弧爾所搯義聲西來動白日電光閃爍搖旌旄金陵宣城不
日得徽州嚴郡隨風迤洞兵三萬餘刃鞘弓藏弢靈旗却指金華城父老爭先將酒烹喉衿閩
楚信州地將軍又為殫力營城壕迺從元戎上台鼎橫金拖紫獨立青雲高將軍未下車民庶
憂忉忉將軍既下車所犯無秋毫健兒不敢忤民意酷吏不敢搜民膏男兒務農耕婦女勤蠶
繅將軍為之垣墉使生厚民適自樂將軍勞瘁鑒貂蟬本無異擬變方名為夔臯嗚呼壬寅春
二月肘腋禍所遭三軍盡躑躅萬姓皆號咷朝廷聞之為痛惜遣中使降丹詔遂有光祿大夫
越國之崇褒有廟有廟依巖■〈山上敖下〉春秋二時祠太牢吹笙鼓瑟兼伐磬玉盃春酒
釀蒲萄畫梁文拱倍輝赫焚香彷彿來焄蒿英姿颯爽毛髮豎陰風吹動團花袍殿前近侍捫
錦條壁上先驅腰寶刀出師或銜枚班師或鳴鼗將軍雖死有餘樂魂魄上與星辰邀有子有
子如將軍志欲與國除麼么鄰敵侵我疆勇捷如飛猱奮身與之戰以一當百戰已鏖將軍陰

兵實助之似聞人馬聲嘈嘈敵驚靈火徧原埜如中羽鏃相呼號我来祠下謁遺像秋林葉落風蕭騷雄文大字紀顛末翠珉已載黃金鼇翠珉已載黃金鼇嗚呼胡將軍將軍生為名臣死廟食將軍之死猶未死嗚呼勸忠之作吾其叨

二喬觀兵書歌

古來尤物多嬌美家國傾危始于此綠珠樓前紅粉空馬嵬坡下花鈿委何似喬公之二娃髮雲不髴濃如鴉傾城顏色何足羨過人才慧真堪誇深院無人春日好不綉鴛鴦被情惱臨風並倚雙頭蓮手把兵書細論討大喬已作孫郎妃小喬又作周郎妻設機制勝妙無敵誰謂頗牧生深閨曹瞞提兵来赤壁千里旌旗蔽雲黑水軍百萬將奈何吳下衣冠俱失色小娃祇席能運籌飄飄殺氣橫清秋綸巾羽扇風采發偉哉公瑾來舒州北軍怕見南風起烈火齊燒舳艫尾孟德零丁匹馬逃檣櫓灰飛付流水滔滔巨浪高如天敵人不敵来戈船乾坤從此限南北盤渦鷗鷺成安眠婦人自古無專制畫師故寫圖中意趙括徒能讀父書堂堂八尺能無愧

徐原父畫梅歌

座客且莫誼聽我梅花歌古今畫者豈不多俗工柰此幽絕之花何花光道人得三昧標格孤高出塵外後來繼之復何人畫師斂手看前輩湯叔雅楊補之我嘗按譜搜瑰奇或如蜂腰繞屈幹或若鶴膝行高枝或如蟹眼競的皪或若兔耳相參差陰陽向背合造化攢三簇四何葳蕤眼看變態不可測記一忘百空爾為寥寥數百年寂寞江村樹乾坤盡埃塵伊誰重毫素人間不是無梅花無人識得梅花趣山陰老王腹如墓能寫千朵萬朵之繁葩權門挾勢求不得徘徊悵望扼腕生咨嗟九里山中草堂窄手種梅花動成百有時正紙戲作推篷圖老幹新捐隘春色尋常更有梅花船繫在鑑湖之濱柳姑之廟前夜半酒豪詩興顛遶湖撐徧十頃玻璃天金華徐君亦有梅花屋終日關門媚幽獨西湖東閣座上親庾嶺羅浮眼中熟三年落筆始一揮觀者已覺心神飛達官名流得真跡珍藏篋笥生光輝有時寫墨梅蕊玄霜點注雪色紙三十六宮貌如玉風流却讓崑崙美有時作紅梅花鵝溪綃上碎染天台霞艷如玉環醉卯酒炯如姑射餐丹砂有時畫釣潭影橫枝下浸滄波冷老龍鳳蟠水鱗夜半熟眠呼不醒有時畫出牆梢孚尹玉氣春風清佳人日暮翠袖薄獨倚脩竹當林■〈土幻〉有時寫雪後容清絕但無比玉癭數點春自生鉄骨一梢僵不死有時寫風前景滿地還飄零粲如魚鱗嗅不腥紛紛點破莓苔青有時或寫烟中骨彷彿傾城在林樾隔幃遙見李夫人燈下玉容終恍惚有時或寫月下魂巫陽招得來黃昏縞衣能歌綠衣舞月落參橫何處村王君筆底縱橫處意匠分明與神遇遂令海內人題詩碎錦零珠不知數憶昔君嘗求我吟一別風雨江湖深十餘年來乏佳句今日為君勞寸心許壇高築臨無地立呼四友来參侍前驅陳玄後陶泓楮生毛穎還同至山根水涯開幾株南枝北枝春有無搜梅之精撻梅髓舊懷新賞成須與金華之山鑑湖水山有奇峰水清泚王徐寫梅伯仲間况復清高亦相似王也騎龍叩天關五雲之中喚不還平生畫梅得真訣置在二十四風花仙之上班徐也少年今白首能事無能出其右世人喚作梅花徐賸有香名吹不朽何水部杜拾遺老夫賴爾相提携尋花索笑往何所夢中着屐行春泥豈不聞凌風之臺卻月之觀歲莫之傷春愁之亂二老迺是詩中豪其餘作者李與桃桃紅李白徒爛熳風韵豈似紅梅高林逋處士請回駕暗香疎影非真畫畫本無聲詩有聲詩人

幾許浪得名我欲尋君牧羊洞自取瑤琴作三弄復念人間知者希梅梢月色誰能共三弄亦不盡離思紛如雲問天乞借驪珠一千顆置在白玉盤中持贈君贈君君莫違什襲當愛惜詩因君畫始霽霽畫得吾詩倍輝赫朝來隱几已忘言更向孤根尋太極花神有靈應笑我此翁也有梅花癖老翁之癖因作歌苦被風騷互推激湛盧豪曾歐冶重綠螭紫燕孫陽識我歌不求衆口誇我才不倚千夫敵但恐為花漏泄春消息花神上訴天為嗔六丁下取飛霹靂

東白軒歌

郡侯軒子名東白邀我題詩寫胷臆自言曾客京華東慣識東方五更色天上雞人唱曉籌青宮問寢當龍樓午門萬戶啟金鑰宵衣聖主思嘉猷左右衣冠盡台輔獻納論思出肝脯螭頭不動香烟高蝦須漸捲晨光吐太學讀書燈火深承恩作簿花溪潯九重堯舜尚憂惕承流宣化當勞心殘月輝輝太白閃雞聲三唱更五點夜如何其夜向晨面視東方色容儼東方未白思明光東方既白瞻扶桑有時顛倒衣與裳簿書期會亦琴堂坡仙赤壁曾題賦亦有當年東白句枕籍舟中何足論豈似君家所扁之小軒

海棠留春鶯歌倣長吉體

環奴本是傾城女帝遣花中作花主玉手親將金剪刀剪碎錦江三月雨猩魂入夢流妖芳翠紗夜燒紅蠟香雙鳥綠衣黃作裳聲聲苦欲留春光青皇馬嘶芳草路胭脂欲捲東風去畫師却倚中山兔留在華堂最深處

子陵釣魚圖為胡伯奇題

光武龍飛膺赤伏臺上功臣三十六先生底事披羊裘翛然獨釣銅江曲嘉謨啟沃當龍潛已令漢火回炎炎三公之棄如敝屣一絲引得貪夫廉但知文叔同衾卧不知客星侵帝座先生之風千載那能忘雲山蒼蒼江水長

題烟波疊嶂圖

憶昨扁舟上南斗順風看山如馬走前山在眼後山失紫翠繽紛落吾手當年見山如畫圖畫圖得似當年無臨軒把玩笑絕倒蚤覺詩思生江湖江風蕭蕭烟水暮盡日漁翁釣魚處安得身輕如白鷗江上飛來又飛去

題胡濟源聽泉樓（戊戌前作）

冷泉亭子深且幽我昔杖履曾追遊山中正當朝雨霽坐聽泉水涓涓流初如松風洒萬壑忽如仙佩鏘鳴璫又如蛟龍起潭窟霹靂閃電摧林丘黃猿抱子掛秋影欲下不下聲啾啾是時同行四五人相對毛髮寒颼颼乃知福地難久住却載酒壺登綵舟故鄉一別幾十載江湖浪迹隨沙鷗風塵湏洞箭滿眼欲歸洗耳嗟何由飛來山色入我夢碧松丹桂枝相樛每逢泉石

必宿留題詩感慨無時休胡君亦是聽泉者曾次磊落非常儔何當暇日登君樓與君作記樓上頭

題鍾馗移家圖

綠袍進士掀怒髯饑來嚼鬼如蜜甜酸風苦雨攪白日移家欲往陰山尖隨兄小妹臉抹漆眼光射人珠的礫鬼奴鬼妾千萬形蟹怪猫妖最蕭瑟勢能使鬼鬼不違髑髏在後嗤鍾馗英雄如山堆白骨莫倚區區手中笏

題陶淵明歸去來圖

典午渡江江水竭寄奴小草當春發先生太尉之子孫管謝之間見人物先生志在義熙前先生道在義皇先北窓清風湛如水閒來一枕供高眠彭澤之衙大如斗雲出無心亦云偶鄉里小兒稱上官辱我門前五株柳有田將蕪胡不耕無官見縛身始輕掉頭一笑賦歸去浮雲富貴非吾情扁舟遙遙颺晴綠咲指吾家舊茅屋門首歡迎拜僮僕三逕依然對松菊黃菊黃菊當我軒濁醪濁醪盈我尊湏與爛醉喚不醒昨非今是何須論田夫農父邀皆去共坐田頭話農務阿舒尔等休讀書讀書要被文章誤

青山白雲圖

若有若無青山之嶙峋欲斷不斷白雲之氤氲往時何人得此意彥公彥敬下筆藝絕倫我歌紫芝白雲裏白雲却向青山起裁雲為吾衣推山作吾几松花釀酒三千石醉後高歌歌未已歌罷仰天笑此樂人中仙心搖赤城霞目斷蒼梧烟左執容成袂右拍洪崖肩五雲之佩何翩翩乘風欲往蓬萊巔蓬萊巔渺何處金銀樓臺隔烟霧青鳥銜書海上来千歲胡麻欲成樹恨不往兮心茫茫雲浩浩兮山蒼蒼人間亦自有真樂還君之圖兮贈君青山白雲作

題五馬圖

開元四十萬匹馬誰是超然出羣者曹韓筆刀非不工須信真龍最難寫真龍只有拳毛騶太宗騎此開唐家雄姿猛氣世無敵當年識者久歎嗟吳興公子畫五匹滿眼風雲起蕭瑟一匹玉花鬣且驕一匹飛黃甚飄逸駁文殊者一匹雄一匹紫電奔長虹中央正立一匹胡青驄遂令四馬皆下風想見承華春苜蓿此馬由來字天育殷紅盤袍帽紋縠奚官秋策采監牧花萼樓前風日遲五王宴罷何逶迤乃知畫師用心苦俟我落筆題新詩大明天子飛龍騎汗血功成即天位真龍復出凡馬空眼見此圖傳萬世

送胡季誠北上

杭州從事真文儒迺是丹山九苞之鳳雛春風葳蕤開玉樹明月皎潔涵冰壺伊昔跨馬遊京都翩翩彩服親庭趨太常博士衆所敬儀表自與常人殊嗚呼耆舊今已無空餘故宅臨東湖

嗟余避地頗相近不得再見成長吁山中六月火雲熱多君為我来肩輿衣冠如覩太常面令我舊事懷姑胥（自註昔與季誠尊翁古愚先生會于楊廉夫姑胥寓舍）呼兒出為佳客拜遣僕往問香醪沽黃雞啄黍或可餉青韭剪雨時堪須夜深秉燭忘夢寐脫巾且挂長松株酒酣慷慨肝膽露駕言欲問青雲途飄然挂席上北斗海濤日出扶金烏觚稜翹首天咫尺五雲深處陳嘉謨先公餘澤猶未已青氈故物還須與青氈故物還須與此行善保千金軀

草閣詩集卷三

○五言律詩

送劉原善赴浙東

金陵城下路送遠意無窮水淨平沙合天寒埜草空
郤超新入幕桓典舊乘驄廿載經遊處憐余感慨同

次呂慎明見寄韵月白疑無地樓高欲近天綠尊■〈扌 弃〉永夜華髮惜疎年見憶新詩句
招遊舊釣船何時共幽隱因注馬蹄篇

楊仲彰見訪次韻

十月荒山道煩君着屐來出詩多舊作行酒只新醅不負陳雷誼兼誇鮑謝才
雙株紅樹下臨別更徘徊

答蔣仲啟

自別南溪友海雲天際多如何屢有約不見一相過埜逕深紅葉茅簷長翠蘿
詩篇空漫興把酒共誰哦

九日懷智上人

九日今朝是相期亦未能簪花憐病客把酒憶高僧河雨舟難買山雲檻屢凭
裁詩坐草閣極目盡漁罾

早春言懷

客懷誰與適偏是早春時紅點溪桃萼黃垂岸柳枝無官能縱酒有子可言詩
此外皆餘事神仙亦浪期

春懷（戊戌後作）

信是春多雨村村水接連荷簑黃犢外倚杖白鷗前既足供詩句何須乞酒錢
古人應念此動即賦歸田

少隱烏皮几羣書且罷看客懷燈下集春事雨中殘湖柳藏歌棹山花拂馬鞍
如今歸未得道路正艱難

幽居

幽居似畫屏詩句滿柴局水繞籬根白山連瓦縫青無能治安策有分太玄經
老時相過應期煮茯苓

村居

村僻無人到安居似野僧柴門交岸竹茅屋帶溪藤煮粥宜襍稻分茶間老菱
百年堪樂此生計日相仍

雨後過畦

十月晴宜雨芄芄野菜新皇天無棄物生意頗如人落筯銀絲滑傾筐翠色勻
盤餐亦多品不信庾郎貧

田頭

莫怪田頭望幽懷未易論詩題隨處處農務自村村鷺點青山破牛耕白水翻
出門無半里歸路任黃昏

夜歸

野翁爭席罷歸路又昏黃步繞陰崖險衣飄積水涼高枝纔宿鳥衰草更鳴蜩
因憶陶元亮田園興不忘

宿田家

薄暮投何處田家白板扉雞棲留客久犬吠見人稀破壁風威勁頽簷月色微
夜深燈火亮猶織木棉機

十月農家

山塢孤村路農家十月天把茅遮舊屋燒土作新田瓶有儲留粟官無橫索錢
舉家雖不飽隨分過今年

山行

山路得秋晴籃輿重亦輕野花留客艷沙鳥去人鳴岩脉交重險灘流合細聲
若於詩句內紅樹最關情

雪後山行

雪後春泥滑籃輿款作程山從岩罅出雲向樹頭生路遠勞行役心幽愜物情茅茨深處見因有午雞鳴

出門

出門經過處將身入畫圖浪花吹石碎松樹挂藤枯遇勝憑詩荅乘危信杖扶酒醪何處有不吝十千沽

發鹿城

江上潮初落好風吹客船孤城辭白鹿小縣入青田山氣晴疑雨灘聲斷復連沙鷗休笑我詩思正相牽

過荷葉浦

雨後乘船好春流處處渾買魚荷葉浦沽酒杏花村野景蒼茫過清詩仔細論磯頭雙白鷺相對似忘言

茶源

晚向茶源過淒涼不可論孤舟千里客茅屋數家村雁落平沙淨鴉棲返照昏唯應愜詩思坐久愈忘言

宿新安驛

一宿新安驛迢迢夜未央有懷投赤縣無夢及滄浪土榻連苔色風簾帶月光清晨聞鐘鼓民俗祀汪王

績溪

落日銜孤嶂行人到績溪野橋通岸窄茅屋隔林低邑古民還聚官清政不迷小亭幽絕甚足以慰羈棲

宣州城外泊

宣州城外泊古樹已棲鴉客路三千里人煙八九家爐煨霜後栗瓶煮雨前茶深夜延清話惟頻剪燭花

水陽夜舟

遠客冬行處孤舟夜發時帆風轉羊角檣月帶蛾眉道路詩中見家山枕上思得歸開篋笥一一示吾兒

山寺

碧水流千轉青山繞百層過橋隨小僕入寺遇高僧石洞深連樹茅簷倒挂藤何時借禪榻清夜看傳燈

春行得驢字（戊戌後作）

春行樂有餘況有酒尊俱綠樹雙啼鳥青山獨蹇驢他鄉真自得故里近何如賴有能詩友清談數起予

十月郊行

連日小齋閉出門幽興多青山雲外斷紅葉樹頭過叢篠羣飛雀晴漪並浴鵝吟餘真自得詩法到陰何

出郊

風雨閉門久出郊晴可憐人行深樹裏犬吠落花前白屋通樵逕青山壓釣船分明在圖畫許可廢詩篇

冬行得邊字

冬行雖寂寞詩句總堪傳紅樹行人外青山去鳥邊醉防歸路險老覺杖藜便牧豎休相訝衣冠本晉賢

雨過許叔大

山雨霑衣濕江雲度水寒也應如杜甫曾此過蘇端綠蟻春漿甕青絲野菜盤平生謝拘束與子罄相驩

宴許晉仲清暉亭

為客開幽徑臨流坐小亭水雲浮檻白埜竹過簷青勝絕詩難賦涼多酒易醒清暉安足擬堪草太玄經

八月二十五夜陳世恭邀賞桂花

中秋過十日丹桂始堪誇
浸酒嘗花味張燈代月華
舊遊人頓少遲賞興尤嘉
謔笑從狂客清歌欠小娃

愁吟

乾坤雖浩蕩無處着愁身
早識文章誤甘於盃酒
親堊花他自好江燕肯來頻
笑從狂客鏡猶誇黑髮新

夏夜

涼宵常苦短獨客況無眠
風物雖殊壤星河却共天
銀槎渾不到玉宇尚依然
細數離鄉日蹉跎又六年

無眠

冬夜寒於水無眠似不禁
江湖為客久雨雪入年深
茅屋疎還漏新詩穩更吟
家書何太少五月到如今

冬至

客裏逢長至山中習短吟
陰陽爭晝夜日月繼升沉
人共梅花老春隨竹葉深
綠知沉醉後翻動故鄉心

除夕

去客猶為客今宵喜有家
喚兒行綠酒教女戴春花
自喜新正近誰憐暮景斜
題詩逐窮鬼無用柳為車

端午得江字

五月榴花雨生涼到北牕
盤行金粽九人醉玉瓶雙
黑髮雖云改丹心尚未降
詩成感今古因弔汨羅江

九日思歸

九日景偏嘉登高至日斜
杯傾新釀酒籬發去年花
白髮人占鵲滄溟客泛槎
異鄉還酩酊行坐只思家

喜雨

雲氣流天濶雷威積雨深未秋何颯颯入夜轉沉沉多稼蒼生命豐年逆旅心道逢農父說如落萬黃金

夜雨

睡美不聞驟夢回方覺寒因驚五月到只作九秋看田野新茅屋江湖舊釣竿幽懷誰與共剪燭坐更闌

對雪

冬半纔飛雪紛紛近酒尊牕明疑白晝衣冷覺黃昏有興須乘棹無求只閉門幽居轉瀟灑詩思滿江村

題林和靖祠

處士當年住西湖正繞門詩名因不死祠宇到今存鶴可充童僕梅堪替子孫淒涼斷橋路纖月照黃昏

題子陵釣臺

漢祖龍飛日先生釣澤中布衣曾友道台鼎不償功七里灘頭月一絲亭上風古今評論者只作隱淪同

海棠

分明守宮血帶露染初勻上苑移根晚他鄉照眼新賦誇詩似錦簪愧髮如銀寂寞東風裏看花憶故人

螢火

流螢何太苦秋至亂階前傍月星偏密隨風火自然吟懷空夜夜歸計又年年縱有蓴鱸興滄江何處船

秋扇

賦性如霜潔將形似月圓暑中誰不愛秋後獨堪憐才士名難遂佳人色易捐清風終有在藏篋待明年

聞鐘

古寺路幽深洪鐘發妙音隨風傳寶閣送月出珠林江海燈前耳乾坤句裏心人生幾昏曉勲業二毛侵

酒醒

酒醒中宵立題詩興轉幽風聲吹雨歇雲氣帶星流日月雙飛鳥乾坤不繫舟歸心與潮水常寄故鄉愁

獨客

竹裏殘僧寺松邊獨客樓溪聲常認雨山氣只疑秋地僻從交絕身閒與道謀如何蘇季子塵滿黑貂裘

晚歸

小逕雖微黑斜陽已淡紅吟懷方冉冉歸興莫匆匆野寺蒼茫入山田曲折通欲行猶未忍少立石橋東

挽魯生蘭石

天育名駒骨丹山彩鳳毛聰明人盡許短折爾難逃書廢塵生架弓閒蘚上■〈山上〉〈弓文〉下〉空餘玉堂老淚雨漲江濤

夜坐（倣孟浩然）

亦知今夕好無地著塵埃人在月下坐風從樹裡來對巢棲鳥定照影去螢回更道襄陽叟清詩解品裁

守歲

歲事雖云盡吾生自有涯送窮車縛柳報喜燭生花京國當年客山林著處家詩成猶不寐■〈扌 弃〉醉酌流霞

嘲雪次胡叔敬韻

一冬無雪落正月始花飛未足成和氣唯能作冷威飄飄欺雨重淅淅弄風微村舍多貧餒陽春未解圍

晚作

落日紅將斂牛羊早下來好詩閒裏得幽抱靜中開已定禽棲樹無驚犬卧苔坐忘心似水無地著塵埃

曝背

愛日經簷處終朝曝背時興深隨境入情盎與春期草木應同惠乾坤亦自私由来至人樂未許俗流知

魁山除夕

除夕逢今夕驅馳感髣髴華歲添新歷日身寓故人家春暖爐燃炭更長燭剪花從今謝拘束詩酒作生涯

訪俞光大山居

立春纔五日同訪隱君家崖石昂如馬田塍曲似蛇詣幽詩緩得扶倦杖堪誇為憶山居好留連至日斜

寄胡伯弘

造物還同戲為人不顧才如何麟趾厚翻受鼠牙灾萱草春猶茂荆花晚正開時清無滯獄行李好歸來

贈胡叔敬

去作隨羣雁歸尋返哺烏難兄雖落寞慈母且歡娛夜雨花銷燭春風蟻罄壺談詩多近藁亦得慰潛夫

秋日感懷

暑盡瀟瀟雨涼生淅淅風朝來一葉落秋至萬家同昔日紅顏子今晨白髮翁卜居猶未遂感激寸心中

東軒雪巾宴集分韻得無字

不合三冬暖長疑片雪無清晨忽撩亂薄暮轉模糊縱飲從諸友愁吟只老夫空林寒悄悄貪看哺巢鳥

秋興（二首）

天末秋風起新涼日漸多故園今已矣歸興欲如何愁至將詩遣狂來對酒歌扁舟猶在眼木落洞庭波

地勢環龍虎天文應斗牛由來賢達士多集帝王州方召輸戎畧臯夔獻治謀老夫才不敏有分在林丘

木棉絞車

鐵軸橫中竅檀輪運兩頭倒看星象轉亂捲雪花浮人力雖施巧天機不自由最憐聲過耳柔櫓下中流

徐孟璣斗室

一室寬如斗危牆穩似船座中疑縮地壺內別為天北海尊常在南州榻自懸曲肱雖樂甚容膝已安然

草閣詩集卷四

○五言長律

聞人夢吉輓詩十韻

鄉選聯科目儒官領縉紳橫經數十載負笈二千人業與河汾並名將稷下鄰繡衣徒薦剡朱紱懶縈身踐履追前輩光輝振後塵丹丘鳴鳳下滄海泛鷗馴宿草經長夜飛花落晚春泗山環馬鬣鯉水戲魚鱗最憶凝熙謚還勝貞曜倫斯文日陵替執筆為酸辛

輓朱留耕十二韻

養譽能超俗延齡似得仙風生談滿座霜染髮垂肩錦里青山外金城碧水邊誰誇五牴富正愛一狐賢曉句簪簞谷春蓑■〈禾罷〉稴田躬耕疲不厭力學老尤專豈謂迎申日俄驚在巳年蒲輪何寂寂草帶已芊芊惆悵蓬科地淒涼薤露篇紉多親友執書有子孫傳去去隨長夜冥冥隔九泉惟應忝鄰好回首涕潛然

牽牛織女

佳期逢七夕星駕不須邀河鼓臨牛渚天孫度鵲橋氣隨涼雨集心與彩雲飄今古千年恨東西一水遙服箱輝列宿鳴杼颯清飈契合終離別歡娛竟寂寥何如未嫁女獨自守寒宵

端陽十韻

纔應蕤賓律驚心景物催艾隨朱戶上榴近綠尊開弔屈人何在沉湘事可哀幾年無買誼何處有歐回龍鬬舟翻雪鼉鳴浪吼雷文章懷往躅歲月等飛埃畫扇逢時節絺衣稱體裁節從閒裏過詩向醉中來枕簟風生竹堦除雨潤苔角巾新浴罷高詠興悠哉

投孔原夫十六韻

柱下周時史儒中孔聖孫及今官愈重稽古道猶存吳越封疆濶東南節制尊繡衣裨日月霜筆贊乾坤八詠樓增偉雙溪水不渾吏曹愁執法民庶喜霑恩白鷺車重到青驄馬載犇分當搜杞梓職在進蘭蓀霧隱南山豹風翔北海鯤賢才難自選憲府更須論賤子非無志飄蓬豈有根胡能上天闕只合在丘園李愿居盤谷龐生老鹿門布衣雙短髻茅屋一荒村舊德人皆仰斯文世所敦烏公禮羅內處士獨慙溫

題蜀山圖五十四韻

蠶叢開迹處追舊已茫然霸業依天險王圖度地偏蜀鄉繁景物秦塞迴人烟邛笮名非一褒

斜路幾千堯封終未徧禹貢豈應全不盡山環遶無窮水接連岷峨相互屬沱漢共洄沿飛鶴
猶難過哀猿尚可緣捫參還歷井入地忽登天峻坂青泥滑嵌巖碧樹圓一吟三嘆息十步九
欹顛行路難如此傷時益勉旃良工曾夙契繪事至今傳路始蠶崖入人於鳥道旋錦江元自
濶玉壘為誰堅迤■〈這里〉瞻眉曲蒼茫憶磬川犍為藏小縣宣化瞰層巔僧寺隨高下商
帆或後先盤渦宜鷺浴枉渚稱鷗眠鎖水通旁港瀘州帶野壩涪翁亭共仰堡子塞堪憐南定
樓雲矗嘉陵石黛妍平林方荔鬱遠嶂復聯翩黔水明沙淑鄧山夾市塵載經夔子國多美武
侯賢八陣躬耕後三分未出前北來愁魏武東下駭孫權猿鳥今蕭瑟風雲亦渺懸空餘灘漠
漠惟有月娟娟工部人千古成都屋數椽雲安嘗伏枕涪萬不聞鵑屢過瞿唐峽須乘灩澦船
垂堂能弗戒上瀨却勞牽捩柁憑三老攤錢問長年壯遊雖去邑故隱必歸田步履西郊外移
家二崦邊白鹽疑雪積赤甲與霞褰所值干戈地皆成錦繡篇江花供句好汀草映袍鮮一老
俱云已羣公抑有焉凝神搜僻壤遊思究殘編高祖炎基肇文翁美化專喧騰長卿檄寂寞子
雲玄躍馬城難恃鳴蛙井易穿赤符重烜赫白帝謾遷延莫晒姜維閣休誇鄧艾氈英雄基始
創庸闇祚難綿中土名猶正邊夷僭罔悛晉唐初改轍李孟又摩肩守固寧修德乘危乃慕臚
浮雲馳往譽流水逐前愆草閣秋風老花溪夜雨懸紛紛看峯嶺歷歷數潺湲咫尺登臨罷揮
毫染素牋

草閣詩集卷五

○七言律詩

寄虞伯生學士

金殿承恩謁翠華
玉堂染翰草黃麻
夔龍禮樂於今盛
班馬文章未獨誇
舊買石田依破屋
新栽澗竹遶晴沙
曲江花樹應無數
草似青門五色瓜

寄蒼巖太守

問訊湘江賢太守
別來為況近何如
梅花月底裁唐律
柿葉霜前草晉書
客至但令尊有酒
官清誰問食無魚
漢庭相業須黃霸
早晚綸音下玉除

寄題高進賢道水竹居

白波高擬石闌齊
翠竹斜連草屋低
六月清風鯉魚起
一春好雨鷓鴣啼
有時門外無來轍
此老林中獨杖藜
我有滿懷淇澳興
幾時親到與君題

寄楊從事

屋近青山雲滿■
〈土幻〉樹翻紅葉鳥爭巢
不貪杖履頻開徑
正想旌麾出遠郊
濁酒賒來同友吃
新詩改罷喚兒抄
綠知日暮空吟望
自向亭中作解嘲

途中寄權伯文知府

陳情書去無消息
老病扶藜強擬行
黃菊西風憐我瘦
丹楓落日為誰明
潁川太守名偏重
少室山人價甚輕
昨夜挑燈孤館後
一蓑烟雨夢歸耕

寄呂浩川池文仲兼柬田德遠

桃花溪上行盃處
想見烟霞繞舊蹤
一醉便成經歲別
百年能得幾回逢
新霜老樹青紅間
落日寒山紫翠重
好約城西田掾吏
杖藜相過興從容

贈五峯李先生

鴈蕩峯南結屋牢
先生高枕聽松濤
麒麟一出空祥瑞
鳳鳥孤飛惜羽毛
漢代文章遷史盛
晉時人物謝安高
懶將白髮供朝紱
縱有銀魚換酒醪

贈杜清碧

先生九曲溪邊住錦里風光太逼真當代如求董狐筆名家正要杜陵人玉堂金馬頻催詔朱絨銀魚懶挂身聞道少微明永夜已知江上有垂綸

贈朱原達（戊戌後作）

江海相違二十年今晨相見一欣然已同葛亮吟梁父況有侯芭識太玄深谷鳥啼雲似水遠林花落雨如烟酒酣不省他鄉客尚憶西湖小畫船

贈曹伯強

衣裁白苧著皂帽羨子遠道來翩翩新豐馬周自逆旅長沙賈生猶少年夜深談詩月在地春濃載酒花連天如此才華易相別莫怪臨風情黯然

贈醫者王玉泉

玉帝山前圖畫如杖藜歸來春雨餘延年豈無赤松術濟世況有神農書丹砂夜煅光射室藥苗曉移香染鉏青雲故人滿江海莫怪門多駟馬車

送郭伯如之臨川令郭舊樂安簿

臨川縣與樂安近正憶弦歌兩度聞白髮今為新令尹紫髯元是舊參軍盃傾野館花如錦船入春江水似雲到日定知民訟簡每延多士細論文

送杜少府之官華亭

少府青袍初入吳官舍春餘一事無彈琴每招華亭鶴舉網或取松江鱸苔衣生綠上弓劍花片落紅霑酒壺風流却憶孟東野溧土賦詩兼射鳧

送栞僧印秋海歸東林

韓子文章最有聲穎師琴調得傳名十年具美知誰繼此地長吟送爾行鉄鳳飛樓開佛日玉虹吹瀑下江城幾時五老峯前路拄杖相過聽短廬

送李秀才北上

五雲深處拱三台閭闔煌煌曉正開義畫欲成龍馬出舜韶初奏鳳凰來行囊豈為觀光計獻策當施補袞才十月江南春色裏把盃遙待錦衣回

送永嘉葛令歸燕

人人盡說丹砂令三載容成德化寬但識絃歌能變俗豈因松菊便辭官扁舟落日孤城遠二月黃河春水寒從此去天纔尺五故鄉風物是長安

送毛仲賢歸越

憶昔乘船往會稽湖山青壓桡樓低路從賀老門前過詩向越王臺上題鷗鷺近人明似雪魚鰕入肆賤如泥經年不到還惆悵送子東行立水西

送曹逢吉

清晨送客過橋東一路行人在畫中紗帽微霑梅子雨葛衣輕受藕花風五雲山色應非遠七步家聲要與同何日重來說詩法月明天碧水樓空

送楊文開潯學秩滿歸省

南潯地小不成州博士官尊易入流楊震舊遺清白在侯芭曾授太玄不三年講席聽風雨八月征帆拂斗牛歸與紫髯稱母壽玉堂誰早嗣箕裘

送朱煉師回仙居

峽山仙人之所居山峯秀出金芙蓉千尋巖上棲玄鶴五色雲中騎碧驢麻姑送酒應到汝木客賦詩能起予每聞花乳石林好相寄休忘錦字書

送楊秀才遊粵

江空十月見晴沙遊子扁舟似泛槎紅葉一林偏對客白雲千里倍思家柳姑廟側魚爭賣賀老門前酒可賒若見草堂王處士煩將素練寫梅花

送馬彥良赴閩

錦帆江上挂東風海國潮生百浦通離浙此時楊柳碧到閩無數荔支紅功名暫屈鹽車驢家世終懷柏府驄何處相思一尊酒三千里外月明中

送穆德敬歸覲

九月連雨秋水生賀家湖上送君行青山對岸似人好白鷺下田如葉輕終軍棄繻亦年少賈誼獻策多成名彩衣歸拜二親後幾日重來懷為傾

送戚縣尉之會稽

越鄉船樣小如梭
婦女牽船唱越歌
秦望山宜篷底看
賀家湖向鏡中過
青袍作尉登臨徧
彩筆題詩感慨多
況是右軍遺跡在
未須射鴨且籠鵝

送陳教授之天台

天台山色引歸袍
行李休辭道路勞
霞彩正於文廟近
瓊臺爭似冷官高
諸生問字携紅酒
座客分題詠碧桃
我亦當年慣遊者
隔江東望水滔滔

送王文玉歸台

八年東郡無詩句
十日西風罷酒尊
俗客若來空滿眼
可人相別易銷魂
霞光照樹丹丘近
蜃氣成樓碧海昏
想見還鄉有餘樂
幾時書札到衡門

送葉主簿之巴陵

行人遠道問巴陵
幾日扁舟過洞庭
白鳥入雲天不斷
紫魚吹沫浪還腥
長才作簿諸公惜
多暇談經小吏聽
回首玉堂春色近
好憑文力播芳馨

送池文仲賜歸侍養

一千里外同徵辟
五百名中獨賜歸
為客已看高士傳
到家應舞老萊衣
雨邊春筍供盤脆
水底寒魚入饌肥
餘暇賦詩銷白日
便風相寄莫相違

送劉宗弼赴浙江按察司僉事

故人喜有劉司業
才大今為耳目官
行路月明驄馬瘦
到臺霜落繡衣寒
十行已受天書寵
三尺須求法意寬
老病彈冠久無夢
但看鵬翼快飛搏

送柯子素往天台省親

最愛丹丘柯道士
倚門清夜夢連環
致身玉洞虛無裏
極目瓊臺縹緲間
一鶴書來丹篆古
雙龍劍舞鐵花斑
也應分得麻姑酒
往駐西池阿母顏

留別榮春巖上人

扁舟欲問西林寺
湖水紆迴到每遲
吏部尚為文暢序
拾遺能廢贊公詩
山中借榻塵機息
月底行盃樹影移
明日風烟各分首
江湖夜雨夢相思

留別南城諸公

相逢常為興匆匆擬賦新詩句未工歲月一身渾是客江湖兩鬢欲成翁
消愁春蠹浮盃綠送喜秋花上燭紅明日溪南又分袂馬頭黃葉亂西風

留別彭士雲管勾

驅馳逆旅似浮萍寥落斯文若曉星遠道已為千里別好詩能復幾回聽
水連徽港滔滔白山過宣城歷歷青天上五雲春色暖願隨染翰侍彤庭

荅禹龍門見柬

高僧元住金山寺飛錫吳鄉未擬回天女散花臺上落神龍避雨鉢中來
久知無本能詩句自笑淵明嗜酒盃別後重逢須記取藤床對雨撥寒灰

和李五峯著作題竹隱軒詩

隱君只在溪南住手種琅玕幾十年玉版每同賓友喫錦棚真比子孫賢
取簫吹月天如海近檻眠秋屋似船更愛滿林涼露下研朱時點馬蹄篇

次陳世恭見寄韻

忽見新詩雙眼明暮雲回首復愁生杖藜不去千山隔躍馬能來半日程
江上蓴鱸空感興山中雞黍已渝盟友生終不如兄弟想見開尊對紫荆

呂思純見訪有詩用答其意

梅雨三日溪水深一舸來訪見幽心洗盃行酒月在地開戶讀書風滿林
子才可陳賈誼策我醉但鼓陶潛琴空山茅屋少供給持此以報雙南金

次韻李師文見柬

無官不用焚銀魚自分茅屋深山居桐華吹處客載酒松子落時予讀書
身遊黃帝畫堦外心到盤古開天初謾勞詩句遠相問已覺富貴浮雲如

次韻楊仲彰見寄

聞道草玄亭子深杖履日日事幽尋酒醪每同田父飲詩句或與山僧吟
堦前鶴啄碧苔色籬下犬眠紅杏陰幾回悵望暮雲遠有懷不寫誰能禁

蔣子宜約遊義安寺不果就飲于家有詩次韻

亦知高誼重交遊投轄相歡醉未休別墅尊罍過永夜上方鐘磬隔清秋淵明豈是辭蓮社安道何須見雪舟
澗水殘山看不厭杖藜還復為君留

葉懋德過訪次韻

故人相別動經歲今日一見心顏開五更詩夢忽生草四月雨聲初入梅正須把袂論出處底用彈鋏歌歸來
花溪水滿魚可釣坐對青山銜酒盃

答陶生羽漸寄詩

青袍白髮歸田後依舊山林隱者風騏驎總宜肥苜蓿鳳凰終亦老梧桐要知維翰過裴皐未許康成別馬融
十幅蒲帆挂烟雨江流元不限西東

所思

不是春來懶賦詩賦詩偏動故鄉思蘇公堤上看花日西子湖頭載酒時三載不歸生白髮幾回曾夢倚烏皮
春風錦瑟遙憐汝夜雨青燈獨對誰

憶昨

家住西湖湖水灣開門日日見青山晚風蝴蝶疎簾外春雨鷓鴣深竹間艤棹門生移酒至入城童子借書還
而今清事何由再阻絕天涯髯欲斑

詠史

始皇（戊戌前作）

六國雄吞似建瓴皂旂從此任嚴刑南巡禹穴功雖刻東度蓬萊術不靈持璧先知祖龍死載車難掩鮑魚腥
驪山草木同衰朽萬古依然自六經

陳涉

甕牖繩樞一隴夫棘矜談笑奮雄圖始從閭左追秦鹿更向祠中託楚狐日者既來徒黨集夥頤纔剪腹心孤回看三尺風雲會曾有朱防等輩無

項伯

馳車霸上語張良舞劍鴻門却項莊交友恩深雖可報君臣義重忍相忘楚歌自此聞垓下漢
爵徒能得射陽若識五文龍虎氣丁公遭戮獨堪傷

項羽

過人才氣更重瞳慣與神騅立戰功三戶亡秦知氣數諸侯朝楚屬英雄孤忠亞父頭空白扶
義懷王血尚紅俛仰君臣多愧色豈唯無面見江東

蕭何

刀筆區區起沛豐經綸事業盡關中撫民為有三章法轉餉能先百戰功漢祖難忘上林苑韓
侯誰使未央宮可憐一代興王畧只與當時主吏同

張良

博浪沙中亦浪謀圯橋一變運機籌豈因漢帝扶炎祚正為韓王報世仇儲嗣真憑紫芝曲神
仙假託赤松遊熟知名就身還辱故爾封侯只願留

陳平

冠玉平生擅美姿已於分肉見施為聲名此日齊三傑籌策當年用六奇周勃固知才不逮王
陵仍有節難移試看諸呂封王後漢鼎端如一綫危

酈食其

皓首猶誇八尺軀入門長揖豈豪麤時人不識監門吏英主偏知好酒徒東下齊城從染鏹西
開漢國未分符雖於青史慚前箸曾是區區一豎儒

陸賈

奉使南夷誰得雋陸生雄辯口如瀾直將冠帶回椎結更倚詩書化溺冠好時歸來初解橐太
中推薦未酬官須知誅呂安劉計正在深交將相懽

叔孫通

太常近侍龍頭日博士初離虎口時尚改短衣從楚製能逃古禮雜秦儀兩生不往誰為鄙三
代相因豈在為賴有忠言爭易嗣汗青傳載似期期

季布

憶自髡鉗載柳車魯朱猶得解紛譁平生任俠何須數不死圖功正足誇楚日將軍猶為主漢廷御史必忘家千秋雖重黃金諾老守河東謾爾嗟

蘇武

憶昔看羊海上居雪寒猶是嚙氈餘匈奴但識祗無乳漢使能令雁有書屬國不嫌恩太少中郎若屈義全疎願將手內清風節賊子奸臣一示渠

草閣

草閣正在江之濱白沙翠竹便為鄰家雞避客飛上屋野鴨成羣來近人石渠翰墨非無地錦里桑麻却甚真目送漁舟行浩蕩一川煙雨渺絲綸

石井山中

石井山中雲繞門題詩不減浣花村已知子可為宗武更願孫能繼審言照眼椒花工取媚向人梅蘂故開繁老来自信生涯好乞與春風日討論

歸田

老病歸來荷主恩田園蕪矣未須論一經有在堪傳子百事無為且抱孫當午鄰雞啼屋上常時乳犬吠籬根武陵謾說漁郎棹須信桃源本是村

遊壽山

雙澗橋西見五峯分明朶朶翠芙蓉半空絕壁開金像百道飛泉噴玉龍怪石坐來斜聽鳥曲闌凭處倒看松平生自倚凌雲筆不媿山僧飯後鐘

夜回三界

官事匆匆敢計程微軀辛苦為蒼生雨寒轉覺籃輿重月黑全憑火炬明路轉松林多虎跡夜投茅屋少雞聲五更又過清風嶺不費推敲句已成

觀潮

江上秋風八月潮浪花吹雪過山椒雄吞越徼聲喧襍高蹴吳天影動搖鐵箭事聞今尚在鴟夷魂遠有誰招滔滔無限朝宗意夜久魚龍漫寂寥

郊外

暖雲過日不作雨客子郊外尋春光
野花朶朶紅間白堤柳絲絲青尚黃
不貪馬上得新句正憶天涯非故鄉
流鶯飛燕自來往底事歸途芳草長

宿山庵

初夏日長夜漸短客子頗愛青蓮庵
明月皎皎鶴在樹涼風蕭蕭龍起潭
小簾琅玕破幽夢深盃琥珀凝餘酣
關河千里暗芳草與爾一曲歌江南

晚興

晚林歸鴉棲未定客子看餘吟
且行青山缺處殘日落碧海盡頭明
月生流光欺人老將至拙學笑我名
無成草閣柴扉已安分金馬石渠空復情

訪田德遠

出郭杖藜輕十里橋西為訪隱君家
晚風山逕吟松葉秋雨溪田落稻花
細數交朋能有幾劇談詩法浩無涯
才華如此須臺省得似青門老種瓜

宴蔣仲行水軒

層軒正在峴山東竟日看山與畫同
楊柳尚含春意綠薔薇更倚夕陽紅
影揮豪客金尊月香引佳人翠袖
風景物留連足懽賞此生只合醉鄉中

旅中秋懷

高秋雲冷雁南飛遊子天涯尚未歸
風雨黃花佳節近江湖白髮故人稀
蓬萊獻賦才名拙盤谷讀書心事違
正是客愁眠不得誰家徹夜擣寒衣

八詠樓與知府權緯聯句

危樓瀟爽近星辰此日■〈亻 〓 木上一下〉文送目頻（緯）
白髮偏催能賦客（曄）青山幾閱倚闌人（緯）
四郊雨足雲歸晚（緯）萬里天回月出新
今古才名真不忝後來誰復繼清塵（曄）

壽日讌胡伯弘昆仲家

胡家兄弟出名門朝夕留賓禮意敦
特為老夫稱壽酒敢忘沉醉坐華軒
春前著蕊梅猶淺臘底飛花雪正繁
石鼎煮茶過夜半少陵詩法正煩論

遊石室寺

石室初從渾沌分呀然一竅氣氤氲山僧慣住鼃鼃窟野老能穿虎豹羣行怪帽簷常礙蘚坐驚衣袖忽生雲幾時更借禪床卧六月松聲絕頂聞

賀吳弘道再令永康

相逢曾記帝王州又向華溪接宴遊陶令雖辭彭澤去寇君終為潁川留雨鳩鳴綠桑連野晴雉翻青麥滿丘早晚治平推第一璽書推上鳳池頭

遊山之樂自楊文開下凡一十五人葉茂德不與作詩以詰之

賤子不出動經月出門四郊多好春微風野桃紅作陣連雨溪水綠成鱗楊雄為文最竒古李白得句徒清新只欠橋西葉徵士酤酒一洗胷中塵

宋明府席上贈胡仲申隱居并邵原性

近年耆舊晨星似況復林泉事考槃白首能來欣倒屣青雲不去恥彈冠日長公館棠陰靜春莫山城雨氣寒更有同行邵文學可辭樽酒罄交懽

對雪懷池文仲

歲莫俄驚十日凍天風吹雪滿江南窮陰積數花應六豐歲標祥白已三出土麥苗還自秀傍巖梅蕊為誰含此時安得池徵士茗椀新詩夜劇談

秋日道中

一上籃輿便有詩詩懷如與素秋期好山到眼時時換流水於人步步隨衣古任從村犬吠心閑惟有野鷗知翛然獨立乾坤外白雪寥寥和者誰

九日無酒

去年有酒嘗醕酏今年無酒空徘徊白衣欺我久不至黃花向人徒自開枯腸何由出芒角渴心從此生塵埃青蚨三百且沽取休負吾家鸚鵡盃

清明有懷

客裏清明多感慨強拈卮酒破愁顏此時榆柳皆新火滿眼松楸非故山春水漁舟來個個曉林花雨落班班登樓轉覺添歸思欲寄尺書無雁還

玩月一首寄國學諸友

吟邊遠客逾千里病裏中秋又兩年人在西風早白髮月從東海上青天金波不盡方流澤玉鏡何因獨欠圓安得清光照衰晚布衣容易到林泉

金陵與諸生玩月時得告

幾年客裏中秋月不似今宵分外明出海得無行路苦照人偏有故鄉情瓊樓玉宇高千尺翠杓金尊下五更來歲倚闌懽賞處柳村回首憶諸生

金陵元夕

金陵城裏逢元夕始信蓬萊不外求山湧六鰲仙子殿星垂萬象帝王州吹笙已遂豐年樂秉燭何辭永夜遊綵筆新詩宜唱和恩波咫尺鳳池頭

題桃源圖

綠桃花發武陵春知是秦時避世人縱使山川異風土依然父子即君臣傍岩茅屋雞啼遠隔水柴扉犬吠頻何日扁舟親到彼坐看烟雨渺絲綸

陳斯德山水畫

南峯北峯雨晴初愛此濯濯碧芙蓉便從谷口請學稼復憶太行曾讀書洞猿出林曉偷果溪獺上灘宵祭魚時危相對失圖畫欲借茅屋身岩居

鼓枻圖

畫圖不必求玄真野服蕭然如古人一竿能敵駟馬貴隻舸乃與雙鷗親楊柳風生綠嫋嫋桃花水動紅粼粼知子此時正堪樂溪魚入饌色朦銀

題清風嶺王氏烈女祠

猶聞虎旅下天戈廟宇經年長薜蘿玳瑁簪斜蛛網密石榴裙短燕泥多即於白刃全吾操為至清風奈爾何賴有篇詩畹血跡清名不廢逐江波

題張伯雨隱居

愛君亭子澗之涯不減西湖處士家長日春風吹杜若有時流水出胡麻山童斬竹供垂釣野客尋源憶泛槎欲信神仙在人世重來猶恐失桃花

借張伯雨韻題楊廉夫隱居

飲馬橋南水亭好尋常把酒對滄波青青岸竹當簷長白白江雲落檻多東野有時曾射鴨右軍無日不觀鵝遂令黃篋樓中客來和先生鉄笛歌

題孟都司有餘清軒

鑑湖西頭飲驄馬水風瀟灑動漣波青山當戶意不盡白月近人光更多梅邊自檢孝廉傳竹外忽聽滄浪歌幾時對雪發幽興獨抱古琴深夜過

題蔣伯康繭窩

蠶叢國內房偏小鮫客機邊構甚奇日射坐氎如挾纈雨經簷瓦似繰絲豈同蝸角虛名誤真與壺天樂事宜許史金張何足羨千間大廈貯蛾眉

梅

翠竹冷渠幸不遮分明開向野人家影斜流水春前樹香淡疎籬雪後花索笑故應催客句亂愁祇為送年華揚州何遜無消息欲寄東風道路賒

謝友人送酒

甞鼎熬成白玉漿鳴鞭走送意難忘開瓶已勝葡萄色入口偏誇荳蔻香未教劉生千日酒應同王母九霞觴黃花正爾欺人老爛醉西風也不妨

輓石珠山璣萬戶

平生禮樂作元戎餘事機謀立武功鐵馬南征如昨日戈船東下忽秋風龍文夜泣床頭劍苔錦朝侵壁上弓最憶閭門舊碑石人人墮淚說羊公

輓陳世恭

花溪廿載遂交遊似子相知百一收孫楚有懷哀甚切耿蘭無報淚空流白頭慈母應多病黃口孤兒不識愁最是斯文從此絕淒風回首卧雲樓

次韻吳德基見贈（併序）

德基太守先生相過季春三月五日也契闊音容嘗形於夢寐一旦接懽尊酒其快何勝俯仰十五年間故舊如晨星落落方欲為詩以叙其故而返屈先施詞翰超騰固難貂續然亦勉為

之以符彼此不忘之語云

纔看作縣上南康五馬歸來鬢色蒼龜鶴隨身今尚在菊松照眼未全荒疎簾雨過山光潤小館春深竹氣涼多幸情親遠相過更題珠玉轉難忘

題胡氏東軒

魁山東頭構小軒尋常風景總堪論牕含滄海千秋月檻拂扶桑半夜暎臨水桃花爭點樹穿泥萱艸故生根友于愛客如春暖日日談詩對酒尊

咏菊二首

胡君伯弘賢昆季雅好菊一日以三本移植瓦缶置諸東軒之下白者對植如玉紫者特立而不羣延玩久之悠然有得因製四韻以彰其美云

君家盆內菊花栽三本偏能二色開白玉仙童迎我笑紫衣卿相為誰來休嫌風景當遲暮正倚文章逼上台如此秋光莫辜負倚闌懽賞且銜盃

東軒紫白二菊予嘗賦詩以詠之矣伯弘之令弟叔敬復出紅黃者三盆於是爭奇競麗照耀前後書齋為之增賁又安可默而無言耶錄似一笑

念子愛賓如愛菊殷懃相賞坐無時已知紫白能專美更遣紅黃為出奇畢卓將螯須左手陶潛把酒只東籬秋風滿地皆蕭艾老眼看花且賦詩

送程知縣赴最官

雨後官河水接連行人初上木蘭船即看治政聞天上便有徵書下日邊玉佩曉趨宮草色錦衣春染御爐煙龍盤虎踞多形勝共祝皇圖億萬年

送徐允中赴國子監

歸觀匆匆有命催式瞻江左莫徘徊南州徐孺應同族太學何蕃不乏才風暖虎闈羣玉聚天高龍闕五雲開須知聖主崇文地袞袞衣冠上省臺

雪

莫怪寒雲蔽日昏雪花如浪灑乾坤今年恨不高三尺去歲何曾落一番入地遺蝗雖已盡繞枝饑雀奈相喧由來造化無兼美且對春風濁酒尊

途中雪

出門飛雪大如拳客子山行興可憐謾道珠光生合浦真成玉氣滿藍田惟驚十里無人跡曾見孤村有竈烟肌骨苦寒何足恨來秋準擬是豐年

輓趙世良

喬木如龍在五雲玉堂家世自超羣六旬已棄人間事一夕俄修地下文古麗諸甥情慘切陳留老友淚繽紛明年九日魁山下共插茱萸只欠君

別胡伯弘仲源叔敬季祥諸昆仲

斗魁山下樹參天文定流風幾代傳兄弟四人皆好客鄉閭諸老總稱賢花溪雪霽春搖蕩翠峴雲深路接連金石交情有如此臨分焉敢廢詩篇

移居

峴山西望翠濛濛客子移居似畫中正喜孟郊家具少不愁阮籍路途窮昔時朝野青雲士今日山林白髮翁從此杜門甘寂寞著書多暇教兒童

題李愿歸盤谷圖

晴峯萬疊翠屏張風景分明似太行野鴨飛時穿柳亂春泉濯處帶花香李侯興趣山林遠韓子文章日月光安得携書白雲裏畫圖千古共徜徉

橙川四詠

橙峯晚雲

壯觀橙川第一峯尋常雲氣接飛龍玉漿流地春無盡翠髻撐天曉更重幾度採芝身縹緲連朝拄笏興從容雖然不作他山雨靈物何曾有定蹤

潘隴春耕

隴上曾傳負米生至今知姓不知名鄉人但比龐公隱使者能忘冀缺耕紅槿日邊黃犢卧綠蓑雨裏錦鳩鳴有時醉倒粉榆社隔舍扶歸稚子迎

梅航讀月

莫怪齋居山似航徐君教子有餘芳青燈只假梅梢月綵筆兼書柿葉霜千古南州名不廢幾人東閣興難忘百花榜上魁名在要借嫦娥一寸光

桃源小境

武陵謾說遇神仙此處分明小洞天始謂山川無道路忽驚雞犬有人烟秋風禾穗黃雲外春水桃花紅雨邊我欲題詩誇絕境詩成又恐競流傳

題徐孟璣愛日堂

高堂春暖晝陰陰愛日祗緣愛母心寸晷豈惟同尺璧一時何啻直千金承歡未覺斑衣老介壽長為白髮深安得揮戈駐流景莫教寒暑互相侵

中秋玩月簡橙川諸友

海上風高八月天分明吹出大銀盤光含宇宙無偏照影納山河却倒看今夜正須傾鑿落幾人能共倚闌干嫦娥也念題詩苦賜與長生白兔丹

憶昔

西湖湖上數追隨好友相忘發興奇蠻榼花間行載酒胡床月下坐談詩昇平樂事懷前日老大光陰愧此時無復能誇人似玉只今惟有髯如絲

題崇壽堂三老圖（并序）

濟源胡君構崇壽堂以尊三老又命工繪為圖其風儀凝著衣冠儼雅各有可觀者濟源既為之序且徵予言為製四韻以復之後人因序以觀其圖因圖以觀其詩則知斯堂之意矣

崇壽堂前三老圖畫師落筆擅江湖即看生面雲為氣盡是高年雪滿鬚洛社諸公今在否香山盛事近來無松傍侍立衣冠者亦是人間寄傲夫

輓傅仲先

百年家計老無愁三子才能長最優暫往句容因祿養將歸古麗竟仙遊丹山碧水迎飛旆白叟黃童望遠舟為寄南豐香一瓣臨風哀此淚雙流

題金華王傅朋墓誌銘後

憶昔衣冠聚一門至今人物見諸孫豈無濟濟才名繼況有堂堂相業存文憲先生銘已刻奎

章學士句堪論庭前手植三槐樹應是頻霑雨露恩

別俞光大

常懷秉燭賦新篇忽復開樽就別筵奔走為誰頻道路棲遲無分共林泉黃肥梅子千灘雨紅
爛桃花五月天此際思君遠相過葛衣蕭瑟晚風前

胡生仕中九日載酒

門生載酒來衡宇埜客簪花憶故鄉酒色纔於今歲綠花枝仍似去年黃殘山剩水登臨厭短
句長歌屬和忙信是乾坤容晚景不知風雨過重陽

春雪

盈尺江南雪未聞花時況復落紛紛長河不雨來春水平地無山起白雲掠兔鷹鷂偏得食銜
魚鷗鷺亦成羣草堂幸喜明如晝獨自看書到夜分

薰風

舜殿南風何太好阜財解愠意相仍五絃琴內聲初起三尺階前教已興比屋有民皆長養康
衢無處不薰蒸蘭臺此日雌雄賦宋玉多才亦浪稱

牡丹

紅紫春來摠浪誇風流須讓牡丹花盈盈仙掌盛朝露冉冉酡顏映晚霞此物宜栽天子苑為
誰來自野人家客中相對俱寥落且與殷勤舉玉窪

草閣詩集卷六

○七言長律

投李右轄十六韻

漢家三十六將軍誰似安東第一勲
練卒舊諳蛇鳥陣斬關新殄虎狼羣
金城列鎮頻紆策玉帳巡行竟解紛
笳鼓五更傳落月旌旗千里捲歸雲
孫吳自古雖論武賈鄧從今但講文
樽俎折衝兵愈奮河山帶礪券還分
雖居鼎鼐崇儒士解使兒童識相君
名動虎闥風肅肅恩流鳳詔水沄沄
營屯細柳連春色山轉烏龍對夕曛
萬里守邊嚴號令三農在野樂耕耘
門延白衣冠盛座引鄒枚禮數勤
詩句賡歌情繾綣香爐宴寢晝氤氲
不才曾辱封書召多病空勞使者聞
滿擬布衣甘杞菊豈期金屋到玄纁
路從薇省朝天上舟過桐江泊水濱
知己感深無以報謾憑長律頌清芬

贈金中孚十二韻

在眼交游總俊髦多君才調獨風騷
蜀都巧織千機錦巫峽雄翻二月濤
心入陰何詩窟遠名登李杜將壇高
雖承紫詔終辭祿若賦丹墀定奪袍
行李清秋逢縣署杖藜薄暮過林臯
金盤屢出銀絲鱠翠甕新開玉色醪
醉後脫巾猶舉爵狂來秉燭更揮毫
孫陽頗解知天馬歐冶偏能試寶刀
莫作後塵工語麗要追前輩擬心勞
吟殘春草看衣線添取晨霜上髯毛
百里去程山岌岌雙溪歸興水滔滔
元龍樓上憑斜月深夜懷人首重搔

送楊文開歸金陵十韻

金陵自古帝王居佳麗相傳畫莫如
王氣不銷龍虎地清光長射斗牛墟
青氈作客愁無那白髮還鄉樂有餘
聯轡總來金轡裏揮毫頻對玉蟾蜍
難兄學問趨天祿令弟才名動石渠
共掃松楸經雨露同依桑梓送居諸
沙頭酒盡雙瓶後江上帆開一棹初
李白詩成誰倡和楊雄賦在自吹噓
秋風此日看鴻雁春水明年憶鯉魚
石井峯前讀書處也應飛夢到茅廬

送孔士安教諭之孔林十六句

孔林東望路漫漫客子清晨跨錦鞍
岱嶽雲開青未了濟河水泮綠猶寒
壁藏科斗今人識（自註識言不識也）
經載麒麟後代看入廟定聞周禮樂
到鄉因會魯衣冠壇存琴奏千年古墓
拱楷連百畝寬贈友但憑詩句好離筵
須望酒盃乾去時春雨梨花白圃日秋
風桂子丹百尺樓頭開宴處候君重與
罄交懽

送邵原性

遊括蒼二月東郊花已冥一番南浦草
初青交游舊雨如今雨送別長亭更短
亭席上新詩纔

十韵沙頭清酒盡雙瓶江湖豪氣青蛇劍沙水生涯白鶴經子美須期才可繼景純兼美術多
靈庭闥已薄西山日雲霧難掩處士星船入好溪銀作浪人登括嶺翠為屏被鞍騷裹應辭策
出匣豪曹始發硎野老得歸雙短髯異鄉相值兩浮萍挑燈後夜思君切高枕陰何欲再聽

秋暮遊橙尖下村居八韵簡王彥璧

秋盡山行日未昏縈紆林壑隱乾坤徑深黃葉疑無路岸轉清溪別有村盤谷縱幽何足羨輞
川雖好未須論過橋苔蘚生巖罅坐石蘿藤挂樹根老嫗蒸藜邀上客阿翁剥棗引諸生新茅
蓋處雞啼屋短杖敲時犬吠門避地正須營草閣逢人何用問桃源不通姓字相賓主願子情
親作弟昆

題問月軒

華軒結構與雲連正在書臺紫翠邊金叵羅中邀皓月玉欄干外問青天廣寒宮殿名虛得大
地山河影浪傳藥搗玄霜分若個樹誇丹桂種何年蟾光此夜因誰缺兔魄今宵却又圓惆悵
姮娥亦無語倒騎白鳳舞翩跹

○七言絕句

冬日

冬日苦短不可說况乃朔風吹倒人鄰童折屐走相報江上無數梅條新

偶成

獨木橋頭芳草齊野人縛屋正臨溪日長課罷渾無事自向花簷掃燕泥

湖堤曉行

宿雲如墨繞湖堤黃柳青蒲咫尺迷行到畫橋天忽醒誰家茅屋一聲雞

冷泉亭觀猿

靈隱寺外冷泉亭蘿風吹日晝冥冥猿啼一聲松子落無數白雲生翠屏

秋晚遊西湖二絕句

八月西湖鏡裏天中流柔櫓下輕烟回頭指點青山好有箇白鷗飛上船

秋夜西湖泛櫓過滿船星斗近天河鳴榔忽動清風起一對鯉魚吹白波
遊西林寺

湖上秋來雨氣深買舟容易到西林青山好處看不盡白鳥一雙穿柳陰
鑑湖舟中

鑑湖秋暮水如天宜與詩人載酒船兩岸芙蓉紅未了小樓絲管出嬋娟
越中燈夕一絕

清光多處是蓬萊金色芙蕖午夜開夾道傳呼避驄馬繡衣御史看燈回
燈辭三首

萬點金蓮燭漸燒水晶簾影夜吹簫只知天上星辰近不覺人間夜色遙
打遍涼州羯鼓聲牡丹花發最分明春宵苦短須沉醉莫使金雞下五更
翠作鰲山繞四圍燈前行樂泥光輝也知今夜春如海雪片如銀不敢飛
守歲有感而作

家人草草具盃盤爆竹聲中笑語懽衣上忽看慈母線淚痕如雨落更闌
烟林詩思圖

青絲絡頭白鼻騮林下春風踏落花最憶吟餘饒野興淡烟斜照數歸鴉
美人引子圖

明粧麗服照青春疑是昭陽殿裏人銀甲彈箏猶未了花前雙引玉麒麟
陳仲美山水

山中古樹色冥冥苑屋斜連薜荔青昨日雲深貪採藥桼猿偷誦太玄經
東坡風竹圖

戲拈雞距紫毫芒寫就風梢數節長從此玉堂雲霧裏都將粉墨繪文章

畫馬二首

黃金如土築高臺郭隗纔登樂毅來若使當年輕駿骨臨時焉有急難材

銀鬃繡膊氣偏驕應是房星降赤霄汗血沙場宜百戰憑誰借與霍嫖姚

老樹擎霜圖

夜寒霜氣裂滄溟潭底老龍眠欲醒萬劫玉漿流不盡化人來聽藥珠經

淵明醉像

玉山頽矣葛巾偏老僕扶持步不前莫道先生渾不醒醉中猶記義熙年

題梅（四首）

西子湖頭春可憐落花如雪晚風顛不辭萬點飄香去乞與珠宮作水仙

羅浮山下隔烟開香雪紛紛入夢來誰謂縞衣今寂寞花光筆裏喚春回

歲暮江南十日雪犯寒開處只南枝揚州何遜苦憶汝寥落人間無好詩

斷橋流水月黃昏幾度相思對酒樽只作總宜船上看槎枒玉樹挂金盃

畫鷹

金眸玉爪下雲端能使羣狙膽氣寒山木蕭蕭秋色老英姿猶向畫圖看

徽廟翎毛

羽毛如錦太葳蕤花石東頭入畫時無限新聲聽未了金風吹動萬年枝

江叟吹笛圖

長江浪險懶垂鈎短笛西風且自由兩岸蘆花如雪白一聲吹動楚天秋

雙竹圖

湘江秋影水雲寬筆底移來只兩竿若挂高堂無六月洒衣蒼雪不勝寒

清溪采菱圖

鑑湖水清越女白日暮採菱歌正長畫舫香風移不動藕花深處看鴛鴦

洞賓小像

洞庭湖水碧如天一劍凌秋興渺然琪樹金蓮栽未了人間回首又千年

墨菊

山僧能剪硯池冰墨色模糊巧作稜自是東籬栽不得却將秋影上溪藤

鈎勒竹為王彥明題

金剪刀裁銀鳳尾珊瑚鈎挂玉龍魂夜深秋影和霜重壓碎湘江月一痕

畫蘆鴈飛鳴宿食

一行斜起雪成羣嘹唳聲多遠更聞夜冷蘆汀眠不得啄殘千頃洞庭雲

紅梅

滿林紅雪影毵毵夜靜和春浸碧潭却憶騎驢二三月杏花小雨看江南

百鴈圖

十月開帆楊子江沙寒白鴈滿船窓畫師貌得當年憶宿食飛鳴五十雙

畫魚（二首）

東風吹動綠蘋洲中有神魚得自由一躍玻璃三萬頃不貪香餌上金鈎

自從濠上無莊惠此樂寥寥直到今翠鬣錦髻看似畫一篙春水落花深

題唐以仁山水圖

莫怪柴門門未關屋頭無數好青山暮年袖却絲綸手一箇魚舟盡日閒

牽黃熊回山

野性由來不入羣歷堦穿竇恣紛紛主人自有茅廬在好去山中吠白雲

瓶中牡丹

古銅瓶中紅牡丹宛如仙女醉乘鸞嬌姿不貯黃金屋却向茅簷造次看

西湖竹枝歌五首

總宜船中載酒波雁兒舞罷近前歌日斜莫拗青荷葉心似藕絲頭緒多

菱角鉤衣為出尖蓮心苦口却回甜妾生不恨郎緣薄自恨春波日夜添

芙蓉花面藕絲裳柳葉眉尖恨最長嗔道王孫金彈子朝朝來打野鴛鴦

湖上春來郎未歸青青楊柳想郎衣郎今走馬章臺路切莫顛狂作絮飛

家住西湖湖岸頭十三吹得樂官愁連環欲結同心事只怕郎心似水流

春日雜興二首

鷓鴣春雨過東風晴日桃花岸岸紅行到小橋聞犬吠人家都在柳陰中

桑葉繞綠多纖纖蕨芽正肥春筍甜茅屋人家風日好老翁捫蝨傍頽簷

草閣圖

雙松樹下半茅堂萬竹叢西一野航畫箇老翁頭似雪坐間書卷對滄浪

畫梅

梅花三昧是花光復有徐生遠擅場遮莫高樓夜吹笛玉奴自有返魂香

暮歸

山腰小路曲如蛇薄暮踈踈雨潤沙醉裏亦知秋色老西風開遍木棉花

謝王彥璧惠墨

故人投分如膠漆許送家藏黑玉圭客裏傾囊無以報草堂絕句手親題

秋陰

莫道朝來滴雨無黑雲遮日已模糊道傍聽得農夫說天氣渾如八月烏

題胡伯奇蘭

澧浦春深長綠芽國香一種最堪誇紛紛俗眼迷凡卉只有君家識此花

初夏書懷一絕

柴門無事晝長關四月書聲綠樹間借問當年誰似我除非盤谷與匡山

梨花圖

梨花如雪弄春寒常記清明馬上看今日賦詩勞想像美人和夢倚闌干

題芷陽書齋

芷陽山中屋數椽樹陰將綠遶堦前客來敲戶不出應看到馬蹄秋水篇

東童良仲聚遠菴絕句

蘭江書法妙無倫鉄筆兼逢遠上人肯向魁山尋野老不辭沽酒典衣頻

題扇圖

憶昨扁舟落鑑湖山庄隨處索菱租誰知三十年前事今日秋風見畫圖

白雲親舍圖

叔剛陳君以親命從師於外闕時省作白雲圖以懷之且求予詩作四絕句前二首明義方之訓後二首著愛日之誠云

昔聞孟母三遷教今見此鄉陳大家馬鬣蓬科自長夜流傳卻有白雲圖

萱草誰云兒女花侵陵雪色耐年華瞻雲莫使斑衣濕好事辛勤到五車

束書千里別慈顏看盡慈烏落照間山外白雲雲下屋倚門昨夜夢連環
遊子思親無奈何青山回首白雲多雖云學問瞻淇澳終念劬勞廢蓼莪

題李後主畫竹

落筆還同鐵鉤鎖照眼何如金錯刀老可小坡應王氣一竿秋影拂滄濤
食茭白

西風吹雨飽秋菰卸却青衣見玉膚客裏嘗新成一笑不圖今日見西湖
徐孟璣送東陽酒

故人遠送東陽酒野客新開北海尊不用尋梅溪上路春風吹氣滿乾坤
題杜居安瘦馬圖

欲試原頭春草長老來筋力已堪傷嘶風復有飛騰志願見當年田子方
題呂宗義扇面雲溪釣隱圖

蘇耽元是橘中仙一局殘碁不記年近日白雲溪上住都將幽興付魚船
歲莫雪中柬俞生仲深叔昭

歲莫棲遲老樹村紛紛急雪洒黃昏乘舟誰效山陰客不是晴天不過門

草閣拾遺

題徐原父推篷圖

憶昔西湖湖上路梅花雪後開無數總宜船子坐推篷偷眼看花索詩句在上不見瓊瑤痕在下不見莓苔根橫梢半截露春色繁花爛熳如兒孫玉龍槎枒卧清曉老幹新條抽未了崑岡玉碎春風來吹香撲鼻知多少天上歸來十五年湖光寂寞真堪怜金樽檀板查無跡但見落日之漁船徐君寫梅奪造化白璧黃金滿高價昔日少年今白頭嘆惜人間空見畫

梅山義塾秋丁

庭燎光寒宿雨過無眠數問夜如何鼓鐘既作聲音間冠佩初臨禮數多聖德由來同日月文章元不阻山河小儒才劣叨司教相與從容託詠歌

留別陳世恭

數年膠漆方投分今日萍逢又索居好客每令樽有酒辭君非為食無魚海棠亭暖春題句簷蔔林香夜讀書兩地關心正相憶便風毋使問音疎

金華留別陳公明

十載從游處雙溪送別時情深猶已子義重忝人師夜雨窓前史春風筆下詩黑頭須努力期爾鳳凰池

題王竹齋墨梅

鼻觀幽香靜可參月明和影落空潭霓裳不動冰魂遠恰似江妃睡正酣

陳世恭昆仲同遊龍泉庵賞海棠

三月江南好風日得意看花馬蹄疾頗憐西蜀之名花爛熳嬌紅逞仙質麗臉猶嫌繁杏艷柔絲已學垂楊密遊蜂迷處萬朶明歸鳥鳴邊一枝出青霞時留仙客佩絳雲夜照維摩室去年載酒常恨晚今歲題詩未開畢道人所樂非一二弟子相隨成六七過眼誰羞花似霧簪帽猶誇髮如漆日斜欲去還徘徊喚取佳人彈錦瑟

京城寄題陳世恭卧雲圖

好山多處翠成羣中有幽人卧白雲只隔紅塵一千里幾回清夜獨思君

戲柬池莘仲

少年一飲輕千鍾力微難染桃花容年深始作汗酒法以一當十味且濃王君親傳坎離鼎出甕鵝黃煮秋影檀心味烈九醞同醉倒伯倫呼不醒清晨喜見雙玉瓶中涵沆瀣光冷冷鸕鷀之杓鸚鵡盞坐使賓主皆忘形我老多愁酒難敵故人未肯分餘瀝座中甘作劉公榮醒眼終朝看山碧

題陳世恭所藏山水圖歌

米公老手無人繼從此乾坤少清氣畫師落筆頗似之素練曲折開秋意上有青山萬疊之嶙峋下有白雲千頃之氤氲丹楓翠栢森左右年深乃成十抱文白石坡頭埜亭小一葉漁舟蕩清曉對岸想像忘機翁坐占蒼苔談未了我嘗四載客京華每見畫圖成嘆嗟垂老歸來愛幽獨欲借雲根半間屋

清風樓歌

君不見義烏門東頭上有百尺屹立之飛樓雕簷稜層象緯逼畫棟縹渺烟雲浮桓桓徐將軍志氣非常儔登城覽形勝構此壯觀東南州樓中班陪盡鵷鷺樓下隊列皆貔貅是時新雨餘六月如高秋炎埃一點飛不到但覺清風四座來颼颼將軍手揮白羽扇身著紫綺裘欄干十二倚霄漢無邊景物歸冥搜東觀覆釜山氣蒸紫翠暖欲流北望芙蓉峯錦繡五色攢空周西有長空倒影之飛檣鐵梁下鎮蒼精虬南有芳草連天之曠野但見飛騎來往秋獮而春蒐楊雲旗■〈土稟〉霜矛禱太乙擒蚩尤魚麗排空金組甲龍泉盡製銅華綬陣前猛士力如虎一一盡戴銀兜鍪將軍登樓長嘯破強敵自與文士相旋周清談動玉塵拂袖揮銀鈎投壺矢錚錚雅歌韻悠悠庾公清興不可及將軍豪思真堪侔我來登危梯撫掌落日驚沙鷗坐覺清風起蘋末醉來詩句生滄洲將軍清風解炎熱亦如南薰羣動皆歌謳清風之樓信千載清風之名千載無時休

送王秀才歸天台歌

李仙入月今幾年酒星飛上瑤臺天文光萬丈銷不盡又遊蓬萊方丈之東邊王君王君醉仙後放浪堪為謫仙友自言身後千載名何似生前一盃酒黃金杓白玉盃勸君滿引葡萄醅掃君頭上如霜之白髮澆君胷次萬仞之崔嵬是時銀海花玉山頽高歌起舞不知夜但見綠蘿樹下嫋嫋涼風來清晨別我飄然去家住紅霞最深處美人笑倚桃花旁飯炊玉甌胡麻香左劉右阮相頡頏故鄉之樂不可當我醉題詩惜相別飛夢時時度雙闕明年有意還復來與君灑掃松下月

貞德堂歌

邇來為父雪讐恥聞者擊節清霜飛秋風蕭蕭木葉落秋日晶晶行雲薄區區俗子不到門自

對青山倚高閣圭也著屐來相過入門磬折求我歌我歌從來不易作與君交契柰爾何夜窓烏几蛟龍吼落筆光芒動星斗要追洋洋風化首闕雖麟趾同深厚方今聖治求華勛觀風使者紛如雲此歌足以揚清芬他日九重天子聞

鍾馗歌

老日無光霹靂死玉殿啾啾叫陰鬼赤脚行天踏龍尾偷得紅蓮出秋水鍾南進士髮指冠綠袍角帶烏靴寬血口淋漓吞鬼肝銅聲剝剝秋風酸大鬼跳跟小鬼哭猪龍饑嚙黃金屋怒氣至今猶未銷髯戟鬚髯努雙目

黃公鍛磨吟

一聲啼鳥驚春破但道黃公能鍛磨問渠鍛就將何為麥熟村民免饑餓麥熟村民免饑餓即今麥缺愁難過

黃熊歌

我家有犬名黃熊不與尋常羣犬同狺狺夜吠捍門戶兼有捕鼠之奇功山居燈盡黑如漆黠鼠出入聲啾唧合曹合類恣所經攪甕盆翻嚙書帙黃熊此時方按行嗾之愈怒威盈盈奮前搏一百鼠散坐令傾洞成清平蒙貴烏圓未須貴宋鵲韓盧莫誇技寄謝區區世上人素餐尸位能無媿

不寐

臂痛愁難忍更長睡不成無由成蝶夢有暇數雞聲況值青陽逼應多白髮生五湖心尚在吟罷氣崢嶸

貞德堂歌（并序）

貞德堂歌者汴人李曄為永康徐君光大妻應女而作也應女名惟貞自幼以端肅聞光大娶之光大儒者也明於易不幸早世其婦於恒卦從一而終之義熟聞之故守節不嫁遺孤六人辛勤鞠育以恩及長勉之從師授業簪珥之飾盡賣以供費今年已七十其子桂葺斯堂以奉之吾黨賢士夫嘉其事且扁是名又形之以詩文是則然矣竊惟婦人無獨成之理其德必本於夫夫者婦之綱也不詳其綱而舉其目非善於辭者也有是夫必有是婦有是父必有是子關雎麟趾悉本於文王乃詩人敦厚之意故余法之觀者倘有取於此云

栢舟不作共姜死夏侯令女今則已古來貞德苦不多落落晨星照經史請談應女生花溪自小端肅聞深閨徐君光大工學易應女束髮與之齊吁嗟年纔三十五良人早沒心何苦偕老相違願莫伸安得與爾歸黃土青年未得身就木空幃別淚吞聲哭有髻不挿他人花採栢南

山動盈掬緝麻坐對寒燈悄縫衣行念諸孤小嚴霜淒淒雞戒曉鳴機夜織猶未了有子名桂字仲芳綵衣獨立鴻雁行母也七十頭如霜願構貞德之高堂貞德堂前棣花茂貞德堂上萱陰覆四時八節禮數勤拜舞稱觴為親壽吾黨作文并賦詩墨花滿紙何淋漓不詳其綱但舉目到手聯篇徒爾為少君名由鮑宣出孟光願與梁鴻匹徐君觀象明咸恒信有其妻解從一遂能教子勤詩書黃簾映雨秋堂虛嫁裝盡賣供束脯任使筐篋無贏餘徐家一門瞻具美夫賢子孝誰得似後人弗替能引之德風便自茲堂起族孫徐圭字孟璣飽觀貞德之光輝

冰山行

玄冥之域窮陰鄉冰山屹立遙相望盤根下令厚地裂上令旭日無精光雕瓊鏤玉千萬狀陰機煜煜孰敢當冰蠶五色不補袞冰柱百尺撐明堂大峯小峯亦旁出爭挾氣勢相軒昂公然列鎮衝要地或為推裂烏臺綱東方蒼龍爪欲墮南方赤鳥口盡僵北方烏龜寒縮頸於菟斂尾蹲西方獨操巨柄凜難觸衆人仰視心彷徨白水真人凝不流桂薪粒玉吁可傷九州封豕食人肉旌旗遍野塵沙黃金城湯池盡瓦礫往往白骨堆秋霜新魂舊鬼相間哭哭聲落日連穹蒼赤者為狐黑者烏北風其涼雨雪雱鳳凰高飛避矰繳梧桐不復生朝陽天威憑憑上帝怒赫日回照天中央冰山傾刻付流水百醜顯露那能藏乃知真龍合變化捲舒雷電功微茫崔嵬截辭今安在徒逞兇惡干天常岷崙自高太華峻齊天作鎮垂無疆君不見萬歲山前春色裏紅雲紫霧朝東皇

章三益匡山行（戊戌後作）

仙人休吹紫鸞笙聽我一曲匡山行青蓮居士讀書處至今石室丹霞明龍泉西南百餘里四面崢嶸翠峯起先生結菴當畫圖正與匡山景相似屋前屋後皆種松坐看百尺蒼精龍苔皮深含霜雪古鐵幹返走風雲從一亭下浸蒼波冷縹緲烟雲成萬頃中有神魚長比人翠鬢翻動玻瓈影一亭上與浮雲齊赤闌干外青天亙分明投壺笑玉女彷彿出海聞金雞東南一亭隱林樾地位清高隔炎熱人間赤日如火流踈簾琅玕自蒼雪最其秀者環中庭周遭萬朶芙蓉青朝來爽氣落我袂蘿風吹日天冥冥鶴怨猿啼歸未得繡衣今作青雲客故山四首五情搖歸夢時時到寒碧自古山林鐘鼎同先生況有前賢風少待功成拂衣去入門依舊山花紅

春山道中與唐仲遲輩分韻得遲缸二字

莫春之初行樂時青衿濟濟亦追隨酒因愛客傳盃數詩欲驚人得句遲溪柳線垂將霧縉野花紅落倩風吹閒中景物千金直休使徵賢使者知杖藜三月青山路風景真如濯錦江在樹啼來黃鳥對隔溪飛去白鷗雙舊題僧寺詩連壁新釀田家酒滿缸寄語朝端故人道歸歟已覺寸心降

題貞節堂

孔氏之家貞節堂大姑守志育賢郎貞如白石凌風雨節比蒼筠傲雪霜截鼻未須論令女髭

髦應不讓共姜明年二月尋巢燕爭忍雙飛入畫梁

唐仲遲送魚

唐生寄我雙魚美老婢揮刀割曉霜遲子不來秋夜永坐看秋月引杯長

秋興

白髮殊方客青雲上國賓莫教輕薄子能侮老成人咄咄書難盡蒼蒼理自陳尊中有美酒爛醉且謀身

田家苦（戊戌前作）

日如火風如血崑崙碎黃河竭雨聲隔雲招不來高田低田龜背裂老農踏車瘦如鬼黑不辨眉白見齒一寸秋苗一寸心汗血願為三尺水霜羅扇霧縠衣冰盤味甜紅荔枝老農有胆誰嘗苦租吏敲門夜騎虎

韓信（詠史）

蓐食相過識者稀時因漂母念寒微設壇拜將功雖稱躡足封王禍已機既以解衣辭武涉如何挈手教陳豨藏弓烹狗尋常事青史千秋有是非

秋風三疊題德鄰家所藏畫

江南七月秋風起吹動白雲千萬里洞庭木落波影寒天外冥鴻饑欲死男兒生無所成良可嘆出門荊棘行路難酒酣拔劍為起舞滿堂星斗光闌干嗚呼一疊兮秋夜永碧梧為我飄金井

江南八月秋風高裂雲直上聲怒號小聲白晝走沙石大聲入海翻鯨濤夜半吹折長松樹衆鳥巢傾無宿處豺虎啖人如蜜甜何處桃源是歸路嗚呼二疊兮秋夜深干戈滿地愁人心

江南九月秋風落殺氣如雲暗城郭濃霜淒淒日色薄玉疊鼓寒聲不作綠草夜奏蘭臺宮問天乞借襄王雄前驅蜚廉後豐隆一洗狐兔無留蹤嗚呼三疊兮秋夜肅變作南風五絃曲

夜望

堦除螢火亂縱橫獨立虛無見紫清北斗三更昏夜色南風五月變秋聲思歸不但如王粲慟哭真應似賈生天上銀河千尺水幾時能洗永休兵

方巖喜雨

觸熱區區到上方疎簾小簾夢秋光片雲忽作千峯暗一雨能為五月涼從此洗兵無戰伐況今多稼免逃亡天涯野客雖寥落吟罷新詩喜欲狂

庚子春三月夢與梁生建中回故居（戊戌後作）

春宵苦夢短合眼在故鄉今宵復何為歷歷所見詳天風吹我巾明月照我裳手持綠玉筇衿佩同翱翔路從北郭門徑詣先塋傍五年缺洒掃青草如人長不忍遽去之徘徊流涕滂迂行羊角埂載出甘泉坊河西與河東人烟眇相望屋廬間新舊田園半榛荒故友四五人相逢訴衷腸剪韭焚枯魚款坐陳酒觴喜極仍自疑兵戈正紛攘人生無羽翮何以逾津梁嚙指驗所經恐為覆蕉隍雞鳴聲喈喈惆悵身在床山川限吳越依舊天一方輾轉久不寐鬱紆祇自傷披衣起待旦聊以成短章

喜雨行

六月驕陽逞炎熱日日南風赤如血東田西田水絕流土膏盡作龜兆裂今晨白帝行新秋乾坤早覺陰雲稠翻江到海龍用壯雨聲不斷寒飈颼颼寰宇盡生意頃者萎黃復蒼翠野老迎神拜且呼農夫賒酒歡還醉草閣道人無寸田也復起舞歌豐年年豐但愿飽吃飯底用枯腸五千卷

甲辰歲九月一夜夢外舅天趣鄭先生問幽冥之事但云海天月色秋茫茫覺而衍其語以寄哀情

外舅實天邁神采冰玉相明經擢巍科氣劇賈董場騁騷自超詣鸞鳳必高翔轍環湖海間著述成數囊弟子滿京國所至留餘芳曄也樗櫟材謬選膺東床提撕感恩厚取別亦已長今夕復何夕漏永猶未央分明入我夢言笑如平常載拜問所從面誨辭慨慷海天既無際月色秋茫茫魂來波浪白魂去雲山蒼音容遽相失輾轉何由忘天地一蜉蝣生死等行藏遊魂乃其變浩蕩隨飛揚去來本無跡暫寓無何鄉情深自難已攬衣涕泗滂

答自便叟薄酒篇倣東坡體

薄薄酒味可求醜醜婦願可酬薄酒有妙理醜婦無嬌羞酒薄亦足澆我愁醜婦可以與之俱白頭平原督郵勝青州黑崑崙曾配冕旒嘗言旨酒亡國哲婦傾城二者豈足為身謀醴酒如澆糟作丘銀鬢翠杓黃金舟婪酣大肚飲一石不能為君銷國憂何如田父共泥飲醉後倒騎原上牛春山作曲眉秋水為明眸朝為行雲暮為雨一身主家十二樓是為喪身之膏盲伐性之仇讐何如荆釵布裙操杵臼深能方舟淺泳游笑彼紛紛冠流猴眼前富貴何異水上之浮漚小年難語大年蟪蛄不知春秋吾儕薄酒任薄醉即休醜婦任醜順即休

題南山獻壽圖

將軍落筆怪且雄能畫嵯峨峯嶺萬仞之奇峯模糊猶含太古色慘澹頗帶清秋容儼如蓬萊三山翠且重又如廬山五老削出金芙蓉千盤萬轉不可測恍惚雲氣隨飛龍下有■瀾之流泉上有偃蹇之長松松根羽人顏色好抱膝盤陀事幽討云是南極天邊之壽星遨遊先天後天老被以青霞裘蔭以白羽葆龜游綠沼沉滄波鹿放蒼崖食瑤草有鶴有鶴飛鳴雪衣丹頂隨風輕兩鶴飄然入紫清一鶴獨立和以簫韶聲手招■〈准上又下〉青童載以白玉笙上朝三十六帝京五雲仙樂來相迎玉女投壺其聲錚錚白兔擣藥使人長生胡君欣得之喜氣何盈盈是時七月天氣涼君來飲我黃金觥酒酣載拜求我歌須臾落筆雷霆轟五岳為之動三江為之傾此圖足為仁者壽題以南山獻壽之佳名胡君胡君宜愛惜我歌歌罷千金直挂向高堂雪色壁夜夜虹光射天赤

哀錢塘

妖兵七月犯錢塘百萬吾民總可傷白壁黃金隨虎豹青娥紅嬾伴豺狼交遊半是泉臺客城郭今為瓦礫場休向吳山高處望滿前骸骨白如霜

登城一首（戊戌前作）

春來懶上最高城一望令人百感生山岳無如今日碎河流不似舊時清青年士子多投筆白首鄉民屢避兵休向東風歌此曲野花啼鳥亦傷情

懷楊廉夫

鐵崖先生天下奇雄文險句鬪蛟螭侏儒紛紛飽欲死草玄亭上髯如絲

懷汪以敬

白雲菴中雲滿窓日日論文空酒缸絕塵天驥能敵萬照水山雞不作雙

懷智雪舟

西馬塍西智上人平生老句不無神少陵已許師前輩無已還甘作後塵

懷鄭本初

越王城中汎棹過紫菱白藕興偏多別後風塵不相見五年江海失陰何

懷魏德剛

東青門頭有惠連五載不見夢相牽得歸茅屋對秋雨與子細說遠遊篇

冬日

冬日苦短不可說况迺朔風吹倒人鄰童折屐走相報江上無數梅條新

冬夜

冬夜恰似夏日長懊惱無睡難禁當走尋梅花作詩伴放取明月照室床

中秋同唐仲暹玩月二絕句

故人乘興夜相過正為中秋月色多綠酒傾來■〈拊 弃〉着醉要題詩句贈嫦娥

八月十五是中秋月色娟娟似水流却憶湖州船子唱幾人歡樂幾人愁

題唐仲暹南塘圖

西風古樹挂寒藤遠近諸峯翠且層却憶賀家湖上路一灣暗綠拘漁罾

題畫二絕句

紫翠縈紆千萬重僧歸日午始聞鐘若非越上雲門寺定是廬山五老峯

老翁居處不勝幽無數青山在屋頭客至便分雲半席坐看落日大江流

戲題淵明圖

詩滿霞牋酒滿瓢黃花香裏興飄飄如今仕宦皆因米誰似先生嬾折腰

訪戴

雪月流光射客衣雪風吹浪打船扉故人溪上苑茨遠乘興何如興盡歸

日鑄墜壁嶺

兩嶺相望四十里十五年前曾此遊野花依舊自春色行路幾人成白頭

過渡

三十六渡春水深蒲萄綠漲愁人心行人且休脫布膀桃樹頭上雙鳥吟

泊練祈塘

枕上春寒酒未醒小舟還此泊蘆汀雨聲欲趁夜船到一夜東風吹塔鈴

題畫梅二絕句

江梅信是丈人行老幹能開白玉花笑殺天台桃幾樹不分清俗要相誇

梅花三昧是華光復有徐生遠擅場遮莫高樓夜吹笛玉奴自有返魂香

山水畫扇

溪上寒雲落日虛青山繞屋樹扶疎抱琴高士紛紛出從此林泉少隱居

煮豇酌白酒歌戊戌前作

煮豇酌白酒豇肥酒氣溫相對二三子其樂難具論君不見曉來雨過東家村叢叢豇莢生籬根阿翁提籃跣雙足採摘採摘呼諸孫歸來笑指老瓦盆酒波猶帶新糟渾田家酒具如窪尊一椀入口春無痕兩椀三椀鯨濤奔四椀五椀和江吞須與飲至百十椀眼花耳熱低乾坤憶昨豺虎如雲屯旌旗滿目烟塵昏殺人如麻血成海十室九家無一存大臣自合死社稷況叨厚祿承君恩近聞省府日筵宴椎牛宰馬齊崑崙吾徒布衣在草野憂心惻惻懷至尊嗚呼蕭艾滿城邑馨香不數蘭與蓀呼童煮豇復進酒呼兒為我關柴門

正月辭

雪消樓瓦鴛鴦暖太液池香翠波滿春愁如織鶯未知新染鶯黃柳絲短美人纖手畫雙蛾繡簾捲得春風多春風開紅又開紫却怕青年逐流水

二月辭

玉為鞍龍為馬遊陽春錦城下水晶盤中鳳凰炙蒲萄綠酒銀壺瀉萬卉千花舞繡衣笑殺提籃採桑者

三月辭

東園雨紅花亂飛繡簾半捲燕雙歸并州剪刀快如水茜蘿新樣裁春衣十二巫山盡神女屏風照見芳心苦宮辭裁罷酒微醺自向金籠教鸚鵡

四月辭

花落長門草青處十二闌干撲飛絮象床玉手印腮紅隔夢一聲啼綠樹笑將金彈打流鶯誰遣芳菲被春誤鳳釵不整雙鬟霧爽風新扇題紈素

五月辭

石榴花開紅染裙綠羅袖捲芭蕉紋睡回金獸沉煙薰玉笙吹下雲中君果壓冰盤水晶碎蔗漿似酒甜難醉猶嫌命薄蜻蜓翅不及桑鳩動成對

六月辭

銀塘花發紅雲滿南風吹香徧宮館舞衣上繡雙鴛鴦綠珠小娘捧冰碗簾紋細織湘波寒碧紗如烟作帳寬水晶簾垂體生栗不識人間有三伏

七月辭

南方赤帝騎龍尾啾啾夜渡銀河水露濕火雲飛不起碧色凝天薄如紙鳳管參差裁短玉別夢瑩瑩冷秋燭金井闌西一葉風吹盡湘妃髻邊綠

八月辭

鯉魚吹長風曲池芙蓉老白天墜涼露濕螢滿衰草蘭房燈燼青獨宿知秋早碧波弄明月自惜顏色好起按鴛鴦絃酸聲攪懷抱

九月辭

畫闌十二凭西風芙蓉照波霜影紅微寒夜侵紫半臂寶帳流蘓篆烟細月明天上來羊車千門竹葉生鹽花挑燈自看班姬傳甘作團團秋後扇

十月辭

美人坐處生陽春芙蓉牡丹聯綉裯沉香火暖然烏銀暖光吼出紅麒麟膽瓶滿貯波寒綠小插疎梅半梢玉蓮葉漏沉猶未眠翠被薰烟惹蘭馥

十一月辭

別館瑤雲曙光冷飛霜落盡宮槐影何人吹動玉參差春透香幃夢初醒 甲屏風圍象床吳綾越羅堆滿箱拈針欲繡雙鴛鴦又恐新愁隨線長

十二月辭

并刀碎剪銀潢水散作飛花半空裏清晨貧女方拾薪寒裂肌膚愁欲死翠衾宿酒人未醒蔗漿調雪消餘醒却呼小玉開瓊戶石闌干畔裝鹽虎

閏月辭

望舒推輪出蟾闕三歲清光多一月露濕瓊樓秋氣寒鏡裏嫦娥生白髮桂高十丈香風滿愁來退作黃楊短樹厄何如人最多熒熒別淚成銀河

愁（戊戌前作）

烽火連天黑旌旗照地紅秋風破茅屋愁殺杜陵翁

小畫

雨林含清風羣峯翠如洗野猿啼一聲白雲在秋水

學圃齋襍詠五首

淅淅風生砌沄沄水滿塘藕根穿土潤茭葉過人長

野竹編籬細山泉灌圃渾碧瓜方布子紫芋更添孫

朽壤蟲徧蝕枯藜螳倒行姜生黃菌蠹茄熟紫膨脝

枉渚雨晴後幔坡風暖初雁頭收芡實魚子剥櫻欄

對客蒸壺爛呼童剪韭頻何如鄭公儉不讓庾郎貧

晚聞雨聲至有作

雨聲來處冷蕭蕭萬木無風亦動搖恰似西陵船乍泊坐聽八月淞江潮

越中燈夕

浙西骸骨白如銀日莫江東起戰塵獨有此城三五夜風光渾似太平民

鷗夢

雪羽眠來近釣舟幾番魂逐海翁遊夜深遮莫風吹醒依舊江湖萬頃秋

逃難

四郊日多壘勞生信乾坤朝來有警急鐵騎如雲屯賤子心實憂焉能守荒村呼兒戒行李一飯同出門路逢逃難人紛紛亦來奔或扶爺與娘或挈子與孫十步九顛躓欲哭聲復吞問道往方岩前後相壓喧牛羊亦隨逐飛橋為之翻我行已岩頂我僕猶岩根昏乾吻亦噪何處濁酒尊茲岩既云險況有靈祠存棲遲且茆屋生理安得論俯視西北隅殺氣猶昏昏

今日無酒

今日無酒何以寫心兒迎我言囊有餘金願言沽之展席長林壺觴既行其樂駸駸頽然既醉載歌載吟掇彼黃花絃我素琴陶潛既遠孰為知音忽忽歲月茫茫古今乾坤蘧廬江海蹄涔知道者希勞勞匪任木鷲竹鵲般翟機深忘憂之子實予所欽

次韵李斯文及與予蔣仲啟劉九德會於楊仲章家

溪上留連景物春天涯牢落宦遊人金尊綠酒那辭醉朱綬銀魚懶挂身楊子法言應有法李侯佳句不無神相逢況是桃源侶此去同為竹逕鄰

和章仲弘梅花燈詩

玉奴檠燭座添春索笑題詩覺有神冰樹生花何太喜銀槎犯斗宛如真香涵和靖祠前月光射羅浮夢裏人誰羨繁華五侯宅金蓮開遍軟紅塵

梅花

到處梅花照眼新縱橫變態似傷春冰霜節操元非俗鐵石心腸亦可親縱使六花多一出也先百卉幾分春海棠雖美終難倡誰使明皇比太真

胡生寫真歌（戊戌後作）

天下幾人能寫真胡生年妙藝絕倫自云慣識卿與相炳炳生面圖麒麟青鞋布襪春雨餘竭來訪我南湖濱手中銀管握造化與予拂拭霜藤新我生本有山水癖形容瀟灑無纖塵頭戴小小烏角巾白衣寬博穩稱身松齋槌几坐清晝意匠經營多苦辛是時賓客如堵牆眼看胡生下筆親斯須置我雪色壁望之宛若神仙人我兒見之亦大笑阿爺胡為能出神或言士者國之寶袞袞皆充觀國賓先生才學世所重曷不秉笏朝丹宸我生出處無不可白鷗萬里誰能馴不作寧戚悲飯牛不作買臣行負薪今年年纔四十六居然抱道安吾貧得君能談帝王畧避世或與漁樵鄰南遊天台北恒岳東登日觀西峨岷乾坤隨處着杖履此地相逢難具陳

山中亦有似拳蕨江上亦有如絲蓴江風蕭蕭日月白與爾長歌歌隱淪胡生胡生且停手玉壺共醉松花春寫真何如嗜經史五車力學須昏晨他年生為席上珍勿云江漢之垂綸

黃楊冠歌酬洪子宜見惠

有樹有樹名黃楊膏沐雨露何蒼蒼平生雖遭厄閨苦年深乃復知材良其材中冠冕其質如圭璋奴桑隸柘超衆木居然正色含中央紫鑲之刀截鵞肪紛紛金屑隨風揚中剝外雕奪天巧意匠經營鄒魯鄉斯須一笑出古制品瑩滑澤見未嘗蒼蠅側足不敢立彈來照手蠟色光進賢惠文空自貴鹿皮椰子安可方洪君得之遠遺我束我頭上半白之秋霜小冠子夏俱二寸俗樣岌岌徒軒昂有時醉後或嬾著掛在清溪石上萬古之松傍洪君求我歌歌罷喜我狂烏紗小巾宛相稱丹嶠翠壑同徜徉

冬夜與池文仲聯句

別懷固云遽會面安可數幸茲東來睽（李）際此險盡剝陽枝碩果抽（池）火井寒烟薄玄雲鬱崢嶸（李）清湍凝瀲灩跳鱗集罟煦（池）歸鳥爭巢啄牕梅粳冰繭（李）簷簷激風葑縮蟄歌女暗（池）覆氎飛奴轂彤輝斂鳥翅（李）白杓起龍角晷短晝當惜（池）更長宵可樂櫺風挾颼颼（李）篝燈閃微邈門■〈門外爲內〉蟾逗光（池）筆駛兔騰握餘酣漱苦苾（李）晚飧飫香穀舒盤梨樞具（池）下筯肴蔬駁薪噓紅麒麟池（李）衣聚彩鸞鸞煖煖銅釭溫（池）漱漱薨豐濁再酌再酩酊（李）一詠一超卓■〈彭上〉下〉鬆髮寒立（池）燭葩顏丹渥胸吞九雲夢（李）氣高幾衡岳吟波恩淼漾（池）行逕踪犂确諸險刮鬼窟（李）搜竒捉妖樸曹劉顛且僵（池）陰何仆而踣敲戛故鏗鏗（李）洗刷增翬翬憶昨赴徵書（池）同年抱經學星言戒迢遞（李）雨卧慙齷齪忽爾展京遊（池）居然擬朝擢才堪百鍊金（李）價重三獻璞予甘返牛衣（池）我忝居虎幄出處調既殊（李）別離手頻搦歸山歎孤陋（池）阻壤懷磨琢賜還主恩重（李）叙舊交情慙促席話欵欵（池）舉家欣嗃嗃雞黍盟不渝（李）鳬羹禮尤朴今知昔乃非（池）動違靜方覺羅縷極道妙（李）縱橫踰獵較意行懽已填（池）句偶巧非斷連衾願遲曙（李）分袂成孤爆耳空警嘹唳（池）心迴來咿喔肩輿兀殘夢（李）手杖橫短擲良晤闕前期（池）塵襟藉深濯重來覓筠泉又見更萸朔（李）

王子約雙鉤竹歌

王君金華人畫竹誇當代此竹乃是鉤勒之所為坐上千人萬人愛令祖藍田王右丞盛唐詩格稱其能將詩變竹寄餘趣傳與衣冠不乏千載之雲祚王君為人清拔俗興來踏遍簞簞谷籠■〈鐘〉桃枝紛入眼■〈聊〉■〈豐〉篋常經日往來曾見吳門道士張溪雲歸晚軒中事幽獨有時不作山水圖戲拈銀毫書此竹王君筆法乃過之翠篠雙鉤出林麓耳根但覺風泠泠比似張生但神速王君寫竹能寫形真成標格非冥冥翛然獨立太素始脫畧粉墨辭丹青或如金錯刀或如鐵鉤鎖或如折戟沉吳沙或如碎璧逃秦火或如銀旛寶勝之飄颻或若金節羽衣之婀娜或如滄江風曳之水衣或如黃河半解不解之冰漸或如白鳳

尾或如蒼龍滌錢刀剪碎波心月丹汞煉就爐中雪初疑荆軻圖窮見匕首又驚毛遂穎脫呈
錐末天機逞其妙形狀何駢闐後生學子競觀看但悟書法如針懸唐時亦有蕭協律所至清
風起蕭瑟眼昏手顫藝轉工一十五葉稱絕筆宋時亦有文湖州畫竹人推第一流能令萬籟
起崖谷出牆之梢為最優東坡作竹短而積別試瑰奇在林僻玉堂多暇圖一枝復有小坡能
畫石前元作者李仲賓琅玕卓立無纖塵薊丘家世不易得父子相傳俱絕倫吳興學士趙公
子飛白之石誰能比水晶宮中春日長移得藍枝落窓几後來又有柯丹丘大葉長梢動冕旒
天顏有喜頻賜予晚節衰颯江湖秋諸公畫竹工畫影隔簾彷彿瀟湘景風景虛無終渺茫野
迴漠漠烟光暝鈎勒寫形纔逼真宛如高閣圖麒麟褒公鄂公毛髮動儼然生面開功臣我欲
題詩寄淇澳瞻彼漣漪散晴綠底為猗猗興不忘有斐君子勞心曲我欲鼓枻遊瀟湘碧雲萬
頃浮天光美人娟娟隔秋水欲來不來空斷腸我欲從獵誇雲夢萬騎紛紜翠蕤送胷中八九
吞不辭文章要比相如重我欲富如千戶侯家居渭川之上遊玉版鄰人許同喫始知熊掌非
珍羞我欲乘風發長嘯扁舟直過湘妃廟中流鼓瑟聲鏗鏘和取湖南竹枝調何如曩昔行李
遊京都故人為我共作翠竹紅梅圖原父寫梅君畫竹價重已壓青珊瑚挂在成均之左廡交
遊軒冕觀如堵須臾盡作王子猷六月清風生肺腑天上歸來十二年柴扉草閣荒山田浮花
浪蘂紛過眼此君風節還依然王君王君聽我語我歌長歌君起舞郇筒酤酒滿眼酤與君歌
盡幽篁譜或栽長竿橫斗高下拂東海之波濤巨絲一鈎連六鰲任公見之顏色勞或招葳蕤
鳳凰宿陰陽各應雌雄六伶倫製律工有餘一聲吹裂崑崙玉或作仙人手中杖此日携來葛
陂上見水猶能化作龍鏗然飛入桃花浪或充奉使手中節節旄落盡竿難折卧起操持十九
年誰謂虛心却如鐵鄉來陳者皆此君與人生成異勲殺青汗簡更殊絕蝌蚪篆籀皆人文
此君由來材不器用舍行藏隨所至願得歲寒同此心故託霜毫寫君意花溪水接雙溪長與
君百里遙相望不如坐君西郊之草堂胷中一吐千畝強歛坑舊硯磨而蒼鵞溪素練雪色光
風情老嫩任君寫無使古人專擅場吁嗟無使古人專擅場

言懷（二首）

夜短苦日長齋居避煩暑青山在屋上流水在堂下好鳥依高枝潛魚集深渚以茲悟天性至
樂乃其所悠然對書帙發軔自太古素心契義軒餘事及鄒魯所以賢達人白首不出戶

清晨事園圃白髮猶未梳引泉灌菘韭趣此春雨餘崧孫年七齡不識詩與書但能助採摘來
往供勤渠阿翁慣蔬食自謂九鼎如所以甘短褐不願乘高車汝身如翁長與翁同荷鋤

題耕牧圖

春田雨餘春水綠烏犍背立雙鸛鵒有叟有叟相追逐手把鉏犁繞江曲初疑龐公之壟又似
子真之谷子孫全家骨肉聚身世百年生計足噫彼利祿不入於心兮所以無榮亦無辱

應用中稅副攝麻城縣擒賊有功為賦長律十韻

麻姑城在萬山陰念爾為官亦苦心百里花封勞暫攝六安草寇擬相侵風寒豺虎嗥青嶂月

黑鷗臬聚綠林纔閃旌旗誰與抗不鳴鐘鼓遂成擒司征乃解陳俘馘乘遽爭誇獻捷音虎拜凝瞻雙闕近龍顏喜動九重深大官奉命來珍饈內使傳恩出賜金香染錦衣歸里閑詩題彩筆動朝簪魯連功就宜辭賞莊舄榮來且自吟我老門生能報國百壺沽酒樂難任

蒼巖畫龍贊

目如電氣如虹怒翻霹靂駕倒捲天河空伊誰之筆蒼岩翁起作霖雨其猶龍

題魚圖

江飈颯起聲蓬蓬白浪晝翻河伯宮羣魚出沒玻璃中揚鬣掉尾各有容大魚雪沫噓晴空小魚戢戢如蠶鼓中有一魚健且雄丹砂作尾雙眼紅揮霍咫尺風雲從近前驚倒濠梁翁回頭爾輩皆凡庸變化已作龍門龍

題陳國光拙齋

濂溪先生作拙賦草閣道人作拙詩已無巧語為君贈謾對幽齋勞我思犧牲文繡鼎俎用樗材擁腫斤斧遺濁醪餽飯且安分高車駟馬將何之

次韻義門鄭仲辨所寄梅花詩

山礬水仙兄弟行只有梅花獨清放去年擬作西山遊苦為耽詩抱微恙今年拄杖敲岩扃恍如羅浮夢初醒幽姿臨風粉蝶妬長梢落雪青鸞驚西湖別來花幾度和靖祠前不知數月出未出天昏黃悄如坐我孤山路却憶斷橋流水東衝寒臘酒盛邨筒只今想像風塵際縞裙練輓情無窮起舞花前為君壽江南一枝春信通分明白絹來斜封珍辭麗筆光炯炯疎枝冷蕊春重重夜來積雪三尺厚繞樹高歌連星斗詩懷笑我清如花歸興為誰濃似酒漫山桃李生春愁孤芳狼籍無人收安得揚州見何遜為花一洗千年羞

長歌贈鄭月岩

我聞蓬萊山乃在碧海之東邊金銀樓臺耀日月丹崖翠壑往往相鉤連中有神仙人長年不知老却是當時鄭子真歸耕得仙道牽牛飲銀河披烟種瑤草瑤草一碧三千秋飄然汗漫人間遊乘風倒着綠綺裘吹笙鶴背遊浮丘追浮丘紫雲中炁炁雙瞳方顏色桃花紅手揮銀管談造化六十甲子羅心胷東看日觀金烏赤西上峨眉雪山白王侯見之倒履迎平生慣識青雲客我是謫仙之後人閑來垂釣花溪濱時危落落不得意空有詩篇驚鬼神鄭君從何來談笑情相親坐爾松下石挂爾頭上巾古來賢達隱耕釣與君且醉松花春彈我龍門七尺之綠桐荐我金盤雙尾之紫鱗酒酣拂袖為戊戌後作傲太白體起舞眼底功名君莫語自許吾身有仙骨富貴浮雲安足數鄭君去兮何如還飛鴻冥冥不可攀送君大道秋風間更呼醪酒澆君顏

喜雨歌

酌爾清酒揚吾浩歌對此好雨不樂云何九州連日愁羲和六龍之駕成蹉跎羣鳥振翅如金鷲啞啞飛啄扶桑柯口噴紅光沸銀河尾梢黃壤焦青禾磬磬赤子汗流血欲上訴青天柰此九關虎豹高嵯峨高嵯峨杳難訴無辜籲天上帝怒上帝怒騰天威誅旱魃鞭雲師長風飄飄載雲旗雲為車風為馬官曹列如麻紛紛自天下玄衣使者面如赭手把天瓢為傾瀉神功倏忽起混茫徧澤地絡周天綱豐隆砰■〈石訇〉擊天鼓靈妃翕歛開電光吹沙走石驚颯颯翻江倒海聲浪浪恍如雪湍飛流噴呂梁又如瀑布倒挂廬山五老之峯旁跳珠濺玉猶未歇高堂六月生秋涼心搖目斷何所見但見千頃萬頃青青秧白雲生歌未已酒酣拂袖為誰起上朝紫皇虛無裏披肝瀝胆叩丹陛昔聞羿射九日死大禹殺湍湮洪水重瞳乘龍竟不還使我悵望凋朱顏願天開聰明鑒予誠三十六帝流恩榮天上迢迢白玉京玉兔擣藥使民生生泰階六符如砥之平甘露零朱草生聖人出黃河清五日一風十日雨千秋萬歲垂鴻名

古風三首

秦坑灰未寒紛紛逐其鹿胡為隆準公高大更疾足信越為干櫓良平廼心腹誅嬴既滅項浩歌大風曲烏盡良弓藏兔死走狗戮偉哉赤松遊所志非辟穀

陳編撫遺事尚憂鴟夷翁摧吳破強敵霸粵成奇功功成宜受賞輝赫凌烟虹烏喙不可共翩然駕孤篷三江水茫茫流譽誠無窮云胡載尤物竟與巫臣同

自從永元來閹監專天威桓靈遂其惡炎祚日已微三君就奸刃八俊幽蘭扉泰蟠僅保身歷歷皆危機賢哲既云亡邦國將焉依瞻烏止誰屋識者涕淚揮

喜錢塘歸附因思先隴

邊城昨夜羽書飛傳道臨安亦已歸魚鱉不驚隨土納豺貅無敵見天威吳山東向晴雲起淞水西流落日微欲掃松楸歸未得詩成喜極淚沾衣

落牙行

昔年左車第一牙居然脫落誠堪嗟今年又一齒欲落未落如秋瓜又如洪河流泛此無根槎清晨■〈鼻丸〉噫忽在地兩齧開豁何豁其餘未落者滿口皆齧齧乾肉不敢決所虞飯有山田砂人生如此老醜露尚敢搖唇鼓舌爭喧譁太官之羊既無分屠門大嚼從人誇但可朝餐地爐所煨之紫芋莫飲瓦甕所釀之松花我不願范睢摺齒作秦相我不願張蒼食乳如魚呿願如昌黎口存十三齒文章千百傳英華

朱留耕閒雲山隱圖

青山在屋上白雲在山椒中有一羽人如鶴不可招手揮綠綺栞和以紫玉簫山風落松花清興何飄飄塵居隔滄海思君五情遙願言從之遊飛佩以逍遙

題友人聽雨詩卷

青草池邊夢未成紫荊花下興還清一家兄弟如聯璧愛聽西牕夜雨聲

梅花絕句九首

南岸北岸花正開欲盡不盡暗香來相將頭白被春惱一日繞樹百千迴

歲暮不歸衣滿塵梅花正爾欺得人欲憑詩句索花笑開甕恰有羅浮春

學士港邊移棹過千樹萬樹得春多人生對酒須縱飲奈此縞衣風韵何

寒花照衣冬雪晴半含半折可怜生西馬塍西對茅屋竹間一樹最分明

不是愛梅頻賦詩出塵標格少人知來蜂去蝶應無數偷眼幽禽却為誰

聞道朝來開滿林孤山無復見幽心即將雪色如雙髻拄杖衝寒細細吟

孤山山南湖水西花蘂箇箇壓枝低別來江海若憐汝那得春風生杖藜

寒月欲出照昏黃疎花密花枝盡香東鄰臘酒味堪飲無錢賒取答春光

忍凍騎驢早得春尋香索句不無神直將風格和花老肯與林逋作後塵

覽鏡圖倣長吉體

天孫不織紅霞綺雪袂臨風吹欲起嬌鬟笑展水晶奩照見芳姿淨如洗

銀刀細剪梨花雲瓊枝倒映瑤池水蛾眉翠斂春山濃愁多惱得腰肢慵

夜冷孤樓素鸞影廣寒宮闕秋重重青女笑霜刮天濕只愁凋損嫦娥容

畫闌桂樹香風草對面團圓思月老願憑青鳥報夫君失時不嫁能長好

雙麗圖

玉闌圍着看花王銀燭燒來照海棠如向美人圖上論不知若箇是專房

次何贊府遊壽山詩韻

我昔手持綠玉杖徧觀壽山寺外峯嶺之奇峯天風吹我衣雲氣盪我胷峯形峙為五烟霞有路遙相通橫秋雙澗橋影枕寒潭空上有欲落不落之怪石下有半枯半活之欹松一峯凌紫霄曙色何瞳矐金雞喚醒海底日絕頂尚有蒼涼蹤一峯翠氤氳恍如武陵之景迷西東山泉春雨餘流出桃花紅在右一峯若覆釜氣蒸雲霧秀所鍾西看瀑泉吼飛雪乃有一峯迥出倒挂虹影於晴穹一峯後顧復何似鳳皇儼若蟠蛟龍輸青獻翠千萬狀並視培塿誇豪雄香爐紫烟遠莫致廬山謾詫金芙蓉伊昔當年紫陽翁二三賢俊題名同嗟予寥落生苦晚不得追陪杖履遊其中兜率臺高花雨濛金仙趺坐青蓮宮何當復約哦松公靈岩石室幽絕處笑揮白玉麈尾盡日相過從

桂月軒歌

何侯之軒萃瀟爽軒前桂樹團團長正當八月天氣清置酒邀賓恣驩賞是時碧落無纖埃瓊樓玉宇中天開爛銀盤升滄海上清光閃爍俄飛來何君手把春秋傳布衣直上清虛殿折取秋風第一枝分明認得嫦娥面嫦娥賜以玉兔之玄霜下醫民瘼令安康花溪邑險難治君獨有暇哦松旁回首番禺幾千里道路茫茫隔烟水涼風蕭蕭露泥泥幾度天香落軒几桂香可挹不可親只有明月能隨人他鄉月是故鄉月舉頭見月偏傷神我嘗想像君家樹為君起舞歌長句好因明月歸去來底用淮南小山賦

瑞雪歌（與李永康）

花溪地偏多酷熱十載已來無此雪遂令禾稼成焦枯復有蟲食根節李侯坐鼓春風琴雪花獻瑞隨人心玄冥剪水成六出翻江倒海驅羣陰遠山近山銀壁立大樹小樹瑤雲集平地俄驚一尺餘薄暮紛紛飛轉急空山徹夜狐狸號狡兔三窟安能逃乾坤肅殺回正氣蚤覺眼界明秋毫田夫農父愁顏破典衣沽酒更相賀來歲還書大有年鼓腹嬉遊免饑餓當年田里無咨嗟漢二千石何須誇縣庭豈用事鞭朴租賦容易供王家泰和乃由天子聖玉燭精調順時令百司効職宜愈勤從今屢見休祥應

孝節堂歌

繡川朱家孝節堂經營乃在雙峯旁堂上種萱紅且芳堂前種竹琅玕長有婦有婦清且揚升堂何以娛姑嫜晨昏定省禮數將采蘋南澗供蒸嘗一從覽鏡傷孤凰淒其無復施紅粧羅幃獨處四十霜年逾八十雙瞳方屢嗔人扶筋力强鳩形拄杖莓苔荒諸孤再拜謝阿娘提孩保養恩難忘當年稱壽綺席張玉杯滿捧丹霞漿蟠桃花開濃露灑斑衣五彩春風香乃知作善天降祥期頤之筭那可量男讀詩書女蠶桑眼看玉立孫成行伊昔比屋封虞唐人生孝節俱尋常後來風靡頹三綱遂令有國旌其孀清德里中松柏蒼行人過者拱不翔滌筆為裁雲錦

章

題呂用實詩藁（戊戌後作）

玉樓仙人魂不死帝遣乘龍下箕尾黃金鑱甲翡翠旗前驅蛇神後牛鬼劍光照空天自立珠
璣迸淚鮫人泣銀河夜漏流銀汁織女秋寒錦機濕女媧鍊成栗色雲青天補作玻璃痕雲妃
大笑電光發金雞叫醒扶桑噉妖星忽墮珊瑚枕髑髏作杯勸君飲瑤池桃花千歲紅染得春
風古囊錦呂仙兩髯黑如鴉慣隨鶴侶餐胡麻金鷺入鼎煨仙骨崑崙頂上牽河車下聽羣蛙
聞簫鼓玉殿瓊樓隔風雨十二門高花滿烟夜半秦王獨騎虎

草閣文集

○雜著

白澤賦

桓山之陽溟海之北粵有神獸名為白澤麋角而鼈趾龍身而虎額牙參差而礪銳目閃爍而洞射百獸逢之駭膽慄魄此形容其彷彿者也若其鬣搖虹光鬚髯飄揚色凝藍澱瑩滑熒煌其吼也雷震其行也風翔赫然而怒則萬牛不能抗其力三軍不能奪其強及夫雄姿改觀觀者流汗氣噴虹蜺燄燭星漢匪虞人之可囿焉嗇夫之能圈伊昔聖皇公孫軒轅從風后與力牧來五彩之雲駟斯獸也遇於虛無之野馴於道德之垣效麒麟而獻瑞似角端之能言知鬼神之情狀窮萬物之根源皇覽曰噫異哉斯獸鄉非爾之通神繫嘉謨其孰究乃命厥工繪其形走列缺驅風霆擲猛火鏘流鈴咋海怪吞山精百邪遁無留停然後降五福於民間共休享於和平也祝曰

猩猩有言罔裨治兮維爾獸名神且異兮玄機從橫挾其秘兮乃圖爾形揚爾之技兮辟邪降禱以惠於世兮

識字耕夫傳（戊戌前作）

識字耕夫者不知其姓氏亦不詳其何代人也嘗■〈尸外立內〉草閣讀書作為文章凡若干言動法古人雅不欲為今人語由是弟子多服從之壹與之接者不謀而固咸曰此高識之士也然性嗜稼穡所居之東偏有田一區日與鄰翁野叟相追逐扶簡編躬耒耜之勞誦而耕耕而息熙熙乎若葛天氏之民也或勸之仕耕夫掩卷而作輒不應又有重其學者默薦之於官執政者不悅曰當今之務奚用識字者為哉彼耕夫也詎知稼穡之艱難哉豈若吾沈默無知取勲爵豐衣食以為妻子計哉或為耕夫憤者曰彼猶鴟鵂腐鼠於■〈宛佳〉雛者也耕夫聞之乃洗耳而去更以筆耕之業游江湖與大明吉先為經學友博通叟為史友載道先生為文友錦官大雅翁為詩友桐城希聲子微為琴友醉鄉居士為酒友空空上人玄玄子為方外友相與講論道理宣達情性上下古今汪洋乎莫知所終先是耕夫嘗有東作詩一章曰陟彼高原稼穡如雲載耕載誦四體孔勤維此東作無施不穫知德者希孰同予樂後凡遇賓友宴集酒酣慷慨必擊缶歌之以為常云

太史公曰世之治也則君子以類而進否則肥遯而已矣彼耕者雖輕身肆志不屑屑於世用然德足以周於身才足以濟於時其過於沮溺之倫遠矣

屏詩神文

李先生嗜作詩積年久矣悵然有不釋於懷者於是具黍一盂載酒一壺歛容屏息端拱而趨三揖詩神而告之曰神之於詩實司其柄我有瑣辭敢瀆神聽粵昔風雅興善懲惡優柔敦厚

匪媮以薄曹劉鮑謝陳宋陰何神之所惠烜赫良多繼茲作者繽紛蝟毛狂瀾砥柱孰障滔滔有雄者甫神實助之縱橫皇緯顛倒蛟螭上規渾噩下拯澆漓度越千古允為我師我藉神休舉不違杜分明町畦巍立門戶幽玄深鉤英華潛咀脫凡入聖遺實求主衆皆諾諾我獨譔譔攘袂切齒怨誹交作僇儂學子求竊糠粃敝帚千金輒謂無比涼涼士流謫詭強倔陰攘其語以為已出或啖其實止徇其名矇瞶五彩瘡聾九成理怪之談古雅之文素所研覆窮朝及曠自業於詩為其所蔽識小忘大舉一遺二是則詩之無益於人也神其醉飽速離此鄉投筆破硯以趨神行言既淵居潛處投隙以覘但聞啾啾啁啁嚶嚶嚶嚶不覩其像彷彿其聲曰子誣予哉余與子游三十餘年動與子俱靜與子專子躋宦途予偕子往馳妍騁俊攄靈競爽援筆一揮光焰萬丈名公碩卿擊節嘆賞子罹窮厄疇為子伶百藝盡卻我獨居先微馨少播聞者欣然賓朋接踵弟子駢肩且子之詩固嚴格律臨文設奇變化不一衰衣危冠黃鍾大呂雅雅魚魚子詩之古綠羆玄熊雕虎驪龍桓桓糾糾子詩之雄翡翠琅玕珠璣錦繡晶晶熒熒子詩之麗化腐為神倏忽翕歛海怪山妖囚入詩窟即故為新爛斑璘璘幽花野草觸景生春以奇為正以正為奇穰苴淮陰孰抗其威凡此數者深入詩域雖子之能實我之力子宜黽勉以定其心益繩于古靡售於今胡不自珍遽形慍喜周於責人畧於求己小人磬磬毀譽紛激洗金以鹽攻玉以石世尚矜誇孰分妍醜薰蕕黜白繽紛雜揉使無侯芭太守醬瓿念子自寬匿瑕容垢明良五子昭紀於書東山鳴鵠杖杜出車聖賢製作貴於璠璣謂蔽子學胡示區區今因細務欲棄大業我辭子行風馳電掣子亦有意於留乎先生於是茫然撫膺怡然解顏抵掌嬉笑從容幽閒迺偃僂曲躬易辭改色延之升堂永為上客

答宋明府四六啟

伏以作之君師聖王所以繼天而立極設為庠序古人欲其美化而移風故虞夏商周之世以來而詩書禮樂之教罔廢比屋有可封之俗當時無不教之民欽惟盛朝聿興文治自辟離而泮水鐘鼓鏘鏘由閭巷而鄉都絃歌藹藹鄉多善士野無遺賢形諸棧樸之詩賡以臺萊之句雖求之古奚異於今（曄）霜鬢飄蕭樗材擁腫從虎闥而歸老六十有餘瞻龍闕而報功萬分無一分甘田野志在山林坐茂樹以濯清泉登高丘而望遠海右車搖落方竊比於昌黎左臂偏枯兼有同於工部已自棄於溝中之斷其何能為席上之珍茲承明府相公先生豈弟如春清廉若水為民間之尹日應天上之郎星下車以來彈琴而治雲興學校即前代之文翁子視人民乃當今之卓茂猶且溫恭下士加之廣博求賢茆茆之束帛來臨亹亹之華文下錫欲掄才以教子俾抗顏而為師匪金鑄其所親兼玉成其他性調非流水敢惜聽於鍾期才本駑駘誤見知於伯樂叨禮義之加異耻聲聞之過情昔龐公不肯入州人稱其德澹臺未嘗至室世以為賢欲行則多愧於古人不往則有辜於執事依違未審進退惟艱於是不謀諸人自斷於已筆耕而謀食即隴畝遺於子孫經綸以持身乃公事見於邑宰上以宣九重日月之德誰曰不然下以和百里絃歌之聲永為好也申酬罔罄兩鑒為榮

附錄

國子助教李君墓誌銘（明）徐一夔 撰

（四庫全書·集部·別集類·始豐稿卷十二）

李轅之奔其父喪也道過錢塘衰經見余泣而言曰轅去親五千里為丞於耀之三原僅朞月而訃音至終天之痛何可言今歸奉襄事自傷祿不逮養苟能圖其所以不朽者亦庶幾慰先人于地下先人之友惟先生辱知最久願哀而賜之銘轅寧舍於逆旅忍死以待余誼不得辭乃為轅作叙而銘之君諱畢字宗表其先汭之封丘人有諱初者從宋南遷遂居錢塘其占籍金華之永康則自君始曾祖諱某妣王氏祖諱某杭州路雜造局提舉有陰德嘗儲粟於市貴糴賤糶且俾糴者自操斗斛妣徐氏父諱貴紹興路新昌縣稅務大使妣柴氏元初有以善相見世祖賜名柴碧眼者其父也教子有法見文學之士與其子游則命欸留治具待之否則戒其謝去君生於延祐甲寅十二月廿日姿俊爽美風儀意氣超邁衣冠潔修狀類貴游子弟少從鄉里師口占詩已能出驚人語稍長好蒙古字學元制蒙古字學視儒學出身為優器局疏通之士多由此進君喉中能吐蒙古人語手寫橫行書頗習嘗侍大使府君宦游新昌浙東僉憲苦思公行縣君以詩謁之公喜曰天才秀發其進未易量也又問習何書則以前所習對公正色曰明經應進士舉獨不可以發身耶公以西北處士起家連持部使者節有重望君惕然有省於是刻意明經往從永嘉鄭公僖學鄭公登泰定甲子進士第需次未上官從學者甚衆君得其指授大要為經義辭章驟出同輩上公命刪潤他弟子所業君加刪潤輒粲然可觀公喜曰如李畢者科第不難致也當以子妻之李秘著孝光鄭公友也以古文鳴東南君持製作請教秘著極加稱賞曰吾友得壻矣其後業成還就鄉試有司以其程文為說過高棄不取君曰科舉豈足以盡儒者之事耶乃營草閣於北門之外取未讀之書盡讀之蓋有毅然直追古人之意阿勒呼木公元室文獻之老自翰林侍講學士退居郡城之東聞君才名延教其子其家多藏書可資記覽君為三年留用是譽日益彰才日益高學日益博矣浙西憲司以君茂才異等薦補衢之常山縣學教諭又薦補衢之包山書院山長皆弗就未幾錢塘被兵挈妻子居會稽進士穆爾古蘇以江東憲司經歷總督浙東諸路軍事以得君為重延居幕下待以賓師之禮居無幾何君度其事無成力辭去遂適婺翺翔東陽永康二邑之間有陳世恭者龍川先生文毅公之後也迎君館於家永康詩書之邑士亦多敬愛君為之買田築室君亦以永康地幽夤樂居之著書賦詩若將以老其身會今上龍興定鼎江左令下郡縣蒐訪遺逸有司首以君貢時方開成均以育羣材既詣考功奏補國子助教君以國家聚材興治之初日從其長設為教條以責成效未及考竟以疾免宿留踰年而還永康其還也嘗語其所親曰吾材縱不如古人吾志亦不敢後於今人今老矣且病復何為哉青山嶙峋白雲在目聊亦樂吾全而已從容自適十有餘年而歿洪武十四年二月三日也初娶鄭氏同知黃巖州事僖之女僖君所嘗從學者繼池氏德清縣尉飛之女子男四長轅今耀州三原縣丞次金剛奴次閏童次慶童皆早亡女二長適東陽蔣大本次適胡士程前鄉貢進士宗熹之子孫男三人曰峒曰嵩曰塘初轅在三原凡衣食棺槨之事皆其壻與其友治之今轅卜以今年某月某日塋於永康縣某鄉某山之原而以池氏祔焉洪武初元余至京師君方養痾秦淮之上余走見之握手道契闊甚慰既而余二人者後先得還雖居有東西音問固不絕也詎意君止於斯哉君天性孝友其兄

貫貲頗裕奉母備至君客授於外或時月不見母輒歸省有異味必以遺母在浙東幕府時其兄病疫方有公事忽得書倉惶戒行李至則其兄病已危瞪目視君頤指取計簿并篋筥鐻器藏之君不避疫之染已百端營救而愈悉還其兄前所付而別君博覽強記隆寒盛暑卷不去手為文蒼古必有為而作不苟不汎至於為詩緣情指事機動籟鳴無窮搜若索之熊而語皆天出不煩刻雕豪放馳騁不見其有餘收斂頓挫不見其不足總其槩要皆不踰乎盛唐人之家法有所謂草閣集者大篇短章近至萬首嗚呼又何其多也有瓌瑋傑特之材不得見之事業而徒見之呻S吟Y佔畢之間可慨也夫銘曰

仙李之系其支實稠其來于南則自封丘有綿世德不顯伊晦仕不擇祿已閱兩世維助教君克奮自儒雲霄遼闊高步未舒晚值更化幸拜一命未攄其蘊俄已引病平生之志何以見之戚忻激慨一發于詩亦既有子以圖不朽雖躋于前而裕于後有崇新阡子也所營九京有知其安且寧

跋草閣集

錢塘李曄宗表元季結草閣居北關門外既而避地永康東陽間洪武初官國子監助教有古今詩六卷拾遺一卷天台徐大章盛稱之金華朱伯清序之觀其長篇聳高奔逸堪與劉伯溫高季廸鼎足而今之杭人未有舉其姓氏者可歎也集中題徐原父畫梅歌云尋常更有梅花船繫在鑑湖柳姑之廟前柳姑者疑即沈約詩所云山陰柳家女也施宿會稽志云柳姑廟在山陰縣西一十里前臨鏡湖湖山勝絕處其後修府志者乃遂削去之是何心哉（四庫全書·集部·別集類·曝書亭集卷五十二）